

Isarhe iyiki Ize iyi Umarku aka atseng

Utsutson ri itsi ubvur Umarku

Awu Umarku, uwuruwi undzumu itsoka iki ig-burh Uyohana Umarku atseng ubvur uwurɛ. Unga awu undzumu uwerhu Ubitru uner itser Uyesu (urhi 1Ubi 5.13). Agbaashia atseng ubvur uwurɛ na adɔrha atseng abvur aki Isarhe Iyiki Ize iyi Uyesu ikitatake.

Ubvur uwurɛ utirhi nggu Isarhe Iyiki Ize iyi Uyesu Ukiristo, Ungwɛ Unum. Ubvur ha udeyiwe ugɛ Uyesu awu uner uwuku utɔitser nu uner ijee. Ubvur uwurɛ udzowe iker akarhãrhã ri itsi abinkɛ Uyesu aka akorhe unangmgbɔ arherhanga nu imesanga. Arherhe aki imaataka ikitatake adzowuke isarhe itser Uyesu ru usatinga ukpu imaatak ru upfung na adɔrha akpe na asok.

Abinkɛ aka awe umɔ

Ititirhi itser Uyesu (1.1-13)

Itser Uyesu ru Ugarhirhi (1.14–9.50)

Itser Uyesu ru Urusharhima (10.1-52)

Usati Uyesu ukpu imaatak (11.1–15.47)

Isisok Uyesu ra akpe (16.1-20)

Isarhe Uyohana Uner Ubɔtisima

(Umat 3.1-12; Irh 3.1-9,15-17; Uyoh 1.19-28)

¹ Itirhi Isarhe Iyiki Ize iyi Uyesu Ukiristo, Ungwɛ Unum.

² Umbɔ aka atsɛng ru ubvur uner uwuku usɔm Arherhu-Num Uishaya ri itsinga agɛ,
<<Uмум iwuri idene ungwɛ itsermum agbaashia ru ungo.

Unga awuri igbishuwa atsĩndĩngo.*

³ Urhɛm uwɔɔ uyisa ra arhum ugɛ,
<Agbishuwe utsĩndĩ Uteijee,
aka agbisha avii atsĩndĩnga arhika.> >>†

⁴ Nggee Uyohana aba, asorhuwe ubɔtisima ra arhum na adzowe isarhe iyi idzidzipa iyiki itsũwe arhim.

⁵ Anera arhɛrhɛ abi abĩ Uyahudiya, nu aner Urusharhima adzek azĩ ru unga. Asɔm arhimmbɔ, unga asorhuwe umbɔ ubɔtisima ra Azɛ Urdun.

⁶ Uyohana atsim atorho igwar urhakumi, abow ikpɔm ubvur nú upfurhsĩnga, ubinghanga uwu asusu nggu utoo arhum.

⁷ Isarhanga hã iyɛ ugɛ, <<Uwɔɔ ruwɔ aka iba ru undzingmum agɔnga umum, uwuruwi umum isi idɛɛ inggarhukũ arhi abadaknga.

⁸ Umum isorhuwa umbi ubɔtisima nggu amɛ, bɔr unga awuri ikũ Ipfu Isarsatangge asorhuwa.>>

Ubɔtisima nu undeya Uyesu

(Umat 3.13-17; 4.1-11; Īrh 3.21-22; 4.1-13)

⁹ Ri ivang hã Uyesu adzeka ru Unazarat ra abĩ Ugarhirhi, Uyohana asorhuwe unga ubɔtisima ra Azɛ Urdun.

¹⁰ Uyesu aka awuri idzeka ra amɛ, unga anyã afã aka ayanga, Ipfu Isarsatangge ru nyaku unurhɛu icipuwa nu unga.

* **1:2** Àka anyã ikɛi: Umrh 3.1. † **1:3** Àka anyã ikɛi: Uish 40.3.

¹¹ Urhem udzeka afã ugər uge, <<Ungo uwu Ungwẽmum iki ìbema. Nggungo umum igũiben akarhãrhã.>>

¹² Kanying Ipfu-Num ikũna unga idzek izĩngge ra arhum.

¹³ Unga awu umə utseku inuma isəka inaa, Ushaitan aka adeya unga. Unga awu nggu íjue arhum, bər ípfu itser-Num itōwe unga itser.

Uyisa angwẽ imesa abi inggbaashia

(Umat 4.12-22; Irh 4.14-15; 5.11)

¹⁴ Umbə aka agbange Uyohana ru ugborzĩ amaa, Uyesu azĩ atsiã Ugarhirhi, anu idzowe Isarhe Iyiki Ize iyi Unum.

¹⁵ Age, <<Ivanga iki ibangge! Nggaye Iyerhu Unum iki iyongge. Àka adzipa, na awe ru imang-mang ri Isarhe Iyiki Ize!>>

¹⁶ Uyesu aka azẽrhã atong ru ubang Ukau Ugarhirhi, unga anyã Usiman nu ungwẽmbə Uandarawu anu itang igber ru ukau ha, umbə awu abika adem aberh.

¹⁷ Uyesu agər umbə age, <<Àka aba adəsa umum, umum itsu umbi awu abika adzui anera.>>

¹⁸ Kanying umbə aneke itang igbermbə na adəsa unga.

¹⁹ Unga aka agəpa azĩ ukunjiir, unga anyã Uyaku ungwẽ Uzabadi nu ungwẽmbə Uyohana ru ukhukhə, adẽẽ igbishu igbermbə.

²⁰ Asi idãrhũmbə unga ayisa umbə. Umbə aneke utembə Uzabadi nggu abi itser imang ru ukhukhə ha na adəsa unga.

Uyesu awayiwe ipfu iyiki ibewe

(Irh 4.31-37)

21 Uyesu nggu angwẽ imesanga atsĩmbɔ Ukafanahum, unum ukpuku uwosha uku uwe, Uyesu atsĩ ru ubã ifɛn-Num atirhi imesuwe.

22 Anera adzeidzeu ri imesanga, ubinkutsu amesuwe umbɔ ru nyaku uner ijee. Asi iwea ru nyaku uwuku umesuwe Ikpem.

23 Umɔ hã uner uwɔɔ ru ubã ifɛn-Nummbɔ awuri ipfu iyiki ibewe itsu ivum igɛ,

24 <<Iyee! Ungu ubee use nggu umɛn Uyesu uner Unazarat? Ungu uba itsĩme umɛn? Umum ihwɛng ungu uwu usarkasar uwu Unum!>>

25 Uyesu atserhi ipfu iyiki ibewe ha agɛ, <<Unukutata! Upfudzeka ru utsak ha!>>

26 Ipfu iyiki ibewe ha iyung utsak ha nggu uvɔm ni itsu ivum idzengge ru utsak ha.

27 Anera kishoo adzeidzeu na arhusa adɔka agɛ, <<Awu use nuwi ikei? Imesa iyiki ifa nu ijee! Atsu ipfu iyiki ibewe idɔsa arherhanga!>>

28 Kanying isarhanga it̃rhã imaangge ananga ra abĩ Ugarhirhi.

Uyesu akerhuwe uzɔma Ubitru

(Umat 8.14-15; Irh 4.38-39)

29 Umbɔ aka adzeka ru ubã ifɛn-Num hã, umbɔ azĩ nggu Uyaku nu Uyohana atsĩmbɔ ri iyambɔ Ubitru nu Uandarawu.

30 Uya utsɛ Ubitru iyora imani unga anu inũ, umbɔ asɔme unga kanying.

31 Nggee unga azĩ adzur uboknga abera unga. Imani iyor ha ikerhungge, unga asok atɔwe umbɔ itser.

Uyesu akerhuwe anera arherhe

(Umat 8.16-17; Irh 4.40-41)

³² Nu urhεε ha, unuma uku utsĩ anera akũ arherha abi írĥārĥã aba ru Uyesu, nu abi ípfu iyiki ibewe.

³³ Arherha anera ru utepa akong nu angwĩ iyaa.

³⁴ Uyesu akerhuwe abi ikpũ írĥārĥã. Ikei atsusuwe ípfu iyiki ibewe ra anera arherhe, asi ibeenga ípfu iyiki ibewe irherha arherhe ubinkutsu ngge ihwengngge unga.

*Uyesu azĩ afen-Num ra anangke
anera aka ashimbɔ
(Irh 4.42-44)*

³⁵ Ri igõkpeka, uzĩ na uborkpɔ, Uyesu asok, aneke iya ha na azĩã ra anangke anera aka ashimbɔ, umɔ unga aka afen-Num.

³⁶ Usiman nu abirabe aka awu nggu unga azĩmbɔ ibea unga.

³⁷ Umbɔ aka anyã unga, umbɔ age, <<Kishoo adẽẽ ibea ungo.>>

³⁸ Uyesu agor umbɔ age, <<Umen izĩmen iteuye iki ikhapa nggimi, umum idzowe isarhe umɔ ikẽi. Ubin ĥã ru ukpɔ uku ukũ umum uba.>>

³⁹ Nggee unga azẽrhã amaa Ugarhirhi adzowe isarhe ra abã ifen-Nummbɔ na atsusuwe ípfu iyiki ibewe ra anera.

*Uyesu akerhuwe uner ingbim
(Umat 8.1-4; Irh 5.12-16)*

⁴⁰ Uner ingbim uwɔɔ aba ru Uyesu, atararhu ashõrhã unga age, <<Ungo uba ubeengo, ungo udẽẽ ukerhuwango umum nu usara umum.>>

⁴¹ Umɔ Uyesu agũ atorh, aberu uboknga abangu utsa ha. Age, <<Umun ĩbeemum, ukerhe!>>

⁴² Kanying ingbimnga ikerhungge.

⁴³ Uyesu asoyiwe unga na avange atonga akarhãrhã agɛ,

⁴⁴ <<Niba usɔmukɔ unera. Bɔr uzĩ, udɛyiwe itsingo ru uwuku udzowe idɛm-Num nu udzowe idɛm-Num iyi Umusa aka amesuwa umbi ri ikikerhe, ra anera ahwɛng ugɛ ungo uku ukerhongo.>>

⁴⁵ Unga aka ikorhe rimi, utsak ha akpurha adzek adɛɛ isisɔme anera, amaa ananga kishoo. Akɛɛ ha atsu Uyesu asi idɛɛ atsĩã uteu ukpɔɔ ri inyĩnyã anera, akpurha aseiyi ru awiya anangkɛ anera aka ashimbɔ umɔ. Rimi hã anera anang adzeyi ri inang aba ru unga.

2

Uyesu akerhuwe uner ishai iyor

(Umat 9.1-8; Irh 5.17-26)

¹ Inuma ukunjiir iki itɔng, Uyesu abvui atsĩã Ukafanahum ikɛi, anera aka agũ ugɛ unga aka aba ri iya.

² Anera arhɛrhɛ akɔng atɔke ubãã, atsu ananga asi ibɔrke ru angwĩ ubãã, Uyesu adzowe umbɔ isarhe.

³ Inera inaa iki itsã uner irhãrhĩ ishai iyor akũ aba.

⁴ Umbɔ aka asi ikpombɔ udĩ ukpuku utsutsĩ ru Uyesu, anera aka arhɛmbɔ, umbɔ afũ ati akang uvi iya ha ra anankɛ Uyesu aka adɛɛ, na acipuwe uner ishai iyor ha nu ufarnga aka anu.

⁵ Uyesu aka anyã imangmangmbɔ, unga agɔr uner ishai iyor ha agɛ, <<Ungwɛmum, aka atsũwãmbɔ arhimngo.>>

⁶ Abika amesuwe Ikpem ase i umɔ ra anang hã akaiferhkɔ ra amɛnmbɔ agɛ,

⁷ <<Awu use utsu utsak uwurɛ arherhe rimi? Unga aka arhenu Unum! Ungamɔ awe ru ijee iyiki itsũwe arhim? Asi iwea Unum ikiyikanga?>>

⁸ Kanying Uyesu ahwɛnga ubinkpi umbɔ aka akaiferhkɔ ra amɛnmbɔ, unga agɔr umbɔ agɛ, <<Awu use utsu umbi awe ru ikpũ iferhkɔ ha?

⁹ Akasong aka ayoa, umbɔ aka idɛyiwe uner ishαι iyor ha, <Aka atsũwãmbɔ arhimngo,> use igɔr ugɛ, <Usisok unyangu ufarngo uzɛrhã?>

¹⁰ Bɔr umum ibee umbi ahwɛng ugɛ Ungwɛ-Ner awea ri ijee iyiki itsũwe arhim ru upfung.>> Umɔ unga agɔr uner ishαι iyor ha agɛ,

¹¹ <<Uмум Īgɔr ungo, usisok, unyangu ufarngo uzĩ ri iya.>>

¹² Unga asok, anyangu ufarnga azɛrhã adzeka ri inyĩnyã anera kishoo. Akɛrɛ ha atsu umbɔ adzei-dzeu na akpoi Unum agɛ, <<Umen inasi inyãmen iferhe rimi.>>

*Uyisa ukpu Urhawi
(Umat 9.9-13; Irh 5.27-32)*

¹³ Uyesu abvui adzek azĩã ru ubang Ukau Ugarhirhi. Anera arherhe aka azĩ akɔng adziira unga, unga amesuwe umbɔ.

¹⁴ Unga aka azɛrhã atɔng, unga anyã Urhawi ungwɛ Uharhfa aka ase i ra anang akika ayɛi i kirbi abĩ. Uyesu agɔr unga agɛ, <<Udɔsa umum,>> unga asok adɔsa unga.

¹⁵ Uyesu nu angwɛ imesanga ase i gha urhɛɛ ri iya Urhawi nggu abika ayɛi i kirbi abĩ nu abirabɛ

aka anyanga umbɔ awu abi arhim arherhɛ. Anera arherhɛ aka adɔsa unga.

¹⁶ Ivangyɛ abika amesuwe Ikpem aka awu abi Ufarisi, aka anyã unga aka aseɪ igha ubingha nggu abi arhim hã nu abika ayɛi ikirbi abĩ, umbɔ arhusa angwẽ imesanga agɛ, <<Awu use utsu unga aseɪ igha ubingha nggu abika ayɛi ikirbi abĩ nu abi arhim?>>

¹⁷ Uyesu aka agũ rimi, unga agɔr umbɔ agɛ, <<Abika aker asi ibeembɔ uner agɔu, abi irhãrhã ukpekũ abee uner agɔu. Umum isi ĩbamum iyisa abika arhurhika, bɔr umum ĩba iyisa abi arhim.>>

Arhusu Uyesu ikpem ighabin
(Umat 9.14-17; Irh 5.33-39)

¹⁸ Angwẽ imesu Uyohana Uner Ubɔtisima nu abi Ufarisi adẽẽ ikpem ighabin. Anera abɔɔ aba arhusu Uyesu agɛ, <<Awu use utsu Angwẽ imesu Uyohana nu abi Ufarisi akpemmbɔ ighabin, bɔr abingo asi ikpemmbɔ?>>

¹⁹ Uyesu agɔr umbɔ agɛ, <<Awu use utsu awɛrhu utsak uwuku ufa akpem ighabin unga aba ana awu nggu umbɔ? Asi ĩkpemmbɔ ri ivangyɛ unga aka awu nggu umbɔ.

²⁰ Ivanga niyɔ ibarɔ umbɔ awuri isoyiwe utsak uwuku ufa ha ru umbɔ, unum hã nukpɔ umbɔ aka ikpem ighabin.

²¹ <<Unera asi ĩkũ utatorho uku ufa abipunga atorho aka agbe. Unga aba akorhunga, utatorho uwuku ufa ha uwuri ishĩrhã avaate atorho aka agbe ha, ivivaar ha iwuri inangge iyi inggbaashia.

²² Ikei unera asi ĩtsuka amẽ ineɓi aka afa ra ambãĩ aka agbe. Unga aba akorhunga rimi, amẽ ineɓi aka afa ha awuri iyare ambãĩ aka agbe ha, ambãĩ

ha nu amē inebi ha awuri iwe ibem. Amē inebi aka afa, awuri itsu ake ra ambāi aka afa.>>

Uteijee uwu unum ukpuku uwosha
(Umat 12.1-8; Irh 6.1-5)

²³ Ru unum ukpuku uwosha ukpoo, Uyesu nu angwē imesanga azērḥā atōng ri icang arhkama. Angwē imesanga aka azērḥā nggu unga, atirhi igbiu atsi arhkama.

²⁴ Abi Ufarisi agor unga age, <<Unyā, awu use utsu umbō azharhuwe Ikpem unum ukpuku uwosha?>>

²⁵ Unga agor umbō age, <<Umbi anasi ivarhumbi ubin Udauda aka akorhe ri ivangye umbō aka agū imerh nggu awerhu uzērḥānga?

²⁶ Ri inum Uabiata aka awu Ukugōng Uwuku Udzowe Idem-Num, Udauda atsi ri Iya-Num, atāiwe usarkasar uborodi, ikēi na abor adzowe awerhu uzērḥānga, ukpurukpi uku usi imēkpō unera atāinga ukpō, uner uwuku udzowe idem-Num ukpekū awuri itāi.>>

²⁷ Mōce unga agor umbō age, <<Angwēwe unum ukpuku uwosha ra anera, asi ingwēmbō anera awembō abi unum ukpuku uwosha.

²⁸ Nggee Ungwē-Ner unga awu Uteijee uwu unum ukpuku uwosha.>>

3

Uner ushai ubok ru Ukafarnahum
(Umat 12.9-14; Irh 6.6-11)

¹ Ivang iyoo unga aka atsi ru abā ifen-Num, uner uwoo umō nggu uboknga ushushai.

² Aboo abee ubinkpi umbō aka ikū akpo uvau ru Uyesu. Umbō atsu asumbō nu unga use unga

awuri ikikerhuka utsak ha ru unum ukpuku uwosha.

³ Uyesu agər uner uwuku ushai ubok ha age, <<Udzek udëë ra asumbə kishoo.>>

⁴ Uyesu arhusa umbə age, <<Imëë umbə akorhu use ru unum ukpuku uwosha, akorhi iyiki ize use akorhi iyiki ibewe, afərhe urhe use afere umgbə?>> Bər umbə aseı ukutata.

⁵ Unga arhi adziira umbə ra avəm, amənnga adake ra amən aka akermbə, unga agər uner ushai ubok ha age, <<Unamu ubokngo.>> Unga anamu uboknga udzek, Kanying ukpə ukerhukpə.

⁶ Məce abi Ufarisi adzek akəki itsūwā nggu aner Uhiridu, abee udı ukpuku ufer Uyesu.

Ikikəng idəsu Uyesu

⁷ Uyesu adzek nggu angwë imesanga azĩmbə ubang ukau, arherha anera adzeku Ugarhirhi adəsa unga.

⁸ Umbə aka agū abinkə unga aka akorhe kishoo, anera arherhe aka adzeku Uyahudiya aba ru unga, nu Urusharhima, nu Uidumiya, nu abi ugar Azë Urdun, nu aner Utaya nu Usidon.

⁹ Anera aka arhəmbə, unga agər angwë ime-sanga akpowe ukhukhəə amë uwuku uci adzowe unga, utsur anera afĩmbə unga.

¹⁰ Unga akerhuka anera arherhe, nggee abi irhārḥā abee izĩ ra asu abanga unga.

¹¹ Ivangye ípfu iyiki ibewe iki inyā unga, ngge igba nú abĩ ra anangnga ni itsui ivum igə, <<Ungo uwu Ungwë Unum!>>

¹² Bər unga avange ngge niba idəyikungge unera unerwi unga aka awe.

*Iseng abi itser Uyesu usɔkdūmen
(Umat 10.1-4; Irh 6.12-16)*

¹³ Uyesu afũã igũ na ayisa abirabɛ unga aka abee, umbɔ aba ru unga.

¹⁴ Unga aseng usɔkdūmen umbɔ aka iwe abi itser Uyesu ugɛ umbɔ awe nggu unga, nú unga adene umbɔ adzek adzise isarhe.

¹⁵ Umbɔ awuri iyiyɛimbɔ ijee iyiki itsusuwe ípfu iyiki ibewe.

¹⁶ Umbɔ hã abɛ, usɔkdūmen hã unga aka aseng, Usiman, uwu ha Uyesu aki iyisa Ubitru,

¹⁷ nu Uyaku ungwẽ Uzabadi nu ungwẽmbɔ Uyohana, abirabɛ Uyesu iki iyisa ugɛ Ubuwarnaji, agbena agburh <<Angwẽ Igbigbashu Inai,>>

¹⁸ nu Uandarawu, nu Ufirhibu, nu Ubatorhomi, nu Umatiyu, nu Utoma, nu Uyaku ungwẽ Uharhfa, nu Utaddiyu, nu Usiman uner Ukan'ana,

¹⁹ nu Uyahuda Uiskariyoti uwuku ugha adaknga.

*Uyesu nu Uba'arhzaburh
(Umat 12.22-32; Irh 11.14-23; 12.10)*

²⁰ Mɔɔɛ Uyesu abvui atsĩ ri iya. Anera abvui akɔng ikɛi, utseku unga nu angwẽ imesanga asi idẽẽ aghambɔ ubingha.

²¹ Abi iyambɔ aka agũ rimi, asok azĩmbɔ idzur unga. Anera anu igɔr agɛ, <<Unga aka azhɔmu ukpong!>>

²² Abika amesuwe Ikpem igambɔ adzeku Urusharhima aba agɔr agɛ, <<Awu Uba'arhzaburh uyerhe ípfu iyiki ibewe unga atsĩ ru unga! Akũ ijeenga ikɛi atsusuwe ípfu iyiki ibewe idzek.>>

²³ Nggee Uyesu ayisa umbɔ na arherhuwe umbɔ unyaka arherhe age, <<Ushaitan awuri ikorha aguse na awayiwe Ushaitan?

²⁴ Iyerhe iba igaungge itsingge, iyerha ha isi ídẽngge.

²⁵ Iya iba igauke itsike, iya ha isi ídẽke.

²⁶ Rimi Ushaitan aba ugapa itsinga, unga asi ídẽnga, imimashanga iki ibangge.

²⁷ Idzidzerhe, unera asi ídẽ atĩa ri iya uner uwuku uker akarhuka abinnga, awuri itirhi abow uner uwuku uker ha. Mɔce unga awuri ídẽ avura abin iya ha.

²⁸ Umum idɛyiwa umbi idzidzerhe, kishoo arhim nu irhenu Unum anera aki ikorhe, awuri itsitsũwũkumbɔ ake.

²⁹ Bɔr uben uwuku urhenu Ipfu Isarsatangge asi itsũwũkumbɔ unga, awu ra arhim aki ugbagbaa.>>

³⁰ Unga arherhe rimi, ubinkutsu umbɔ aka agɔr age, <<Unga awe ru ipfu iyiki ibewe.>>

Uya Uyesu nu angwẽmbɔ

(Umat 12.46-50; Irh 8.19-21)

³¹ Mɔce uya Uyesu nggu angwẽmbɔ aba atĩa. Adẽ nú awiya, na adene uwɔɔ unga ayisuwe Uyesu.

³² Ikikɔnga isei adziira unga, umbɔ adɛyiwe unga age, <<Uyango nu anapumbi abeea ungo ra awiya.>>

³³ Unga arhusa umbɔ age, <<Awu umbɔ ungamɔ awu uyamum nu angwẽmen?>>

³⁴ Unga arhi abirabe aka aseí adziira unga na age, <<uyamum uwi nggu angwẽmen!

³⁵ Uben unera aka ikorhu ubinkpi Unum aka abema, unga awu ungwēmen nu unapumen nu uyamum.>>

4

*Unyaka arherhe uner uwuku
udoī abin
(Umat 13.1-23; Irh 8.4-15)*

¹ Ikei Uyesu atirhi imesuwe nú ubang ukau. Ikikōnga iki ikōng idziir unga irhēngge, unga asok atsī ukhukhō amē aseī ru ukau, ikikōng anera idēē umō nú ubang ukau ha.

² Unga akū unyaka arherhe amesuwe umbō abina arherhe, agər umbō age,

³ <<Àka akpeto! Uner irham adzek azī idoi ikpūnga.

⁴ Unga aka adēē inna ikpū hā, ikpū iyō igba nú utsīndī, anunu aba akpōuke iyi ha.

⁵ Iyō igbei ru ukpōrha, abī asi iweke akarhār hā. Ngge imər kanying ubinkutsu, abī anang hā asi ighorke.

⁶ Unum uku urhang, imani ikoikungge ikpū iyi ha, ubinkutsu ngge ishingge ra anūnang.

⁷ Ikpū iyō igba ri ididōk, ididōk iseng itong iyi ha, ngge isi ighwerngge ikpūr hā.

⁸ Iyō ikei igba ra abī aka aze. Imər idzeka, iseng ni ighwər ikpūr hā, iyō isōka itaitaar, iyō isōka utōtōī, iyō ananaka.>>

⁹ Mōce Uyesu age, <<Uben unera aka awu ra ato akika agū, neke unga agū.>>

¹⁰ Ivangye Uyesu aka aseī ikiyikanga, angwē imesanga usōkdūmen nu abōō aka adōsa unga arhusa agben unyaka arherhe ha.

¹¹ Unga adɛyiwe umbɔ agɛ, <<Aka adzaambɔ umbi ihwɛng iwiwɔk Iyɛrhe-Num. Bɔr abirabɛ aka awu ra awiya, abina kishoo awuri irherhuwe umbɔ ru unyaka arherhe.

¹² Ngge itsu,
 << <Umbɔ awuri irhirhimbɔ,
 bɔr asi inyãmbɔ,
 awuri igũmbɔ ikei
 na asi ihwɛngmbɔ,
 utsur umbɔ adzipa na atsũwũkumbɔ arhimmbɔ!>
 *>>

¹³ Unga agɔr umbɔ agɛ, <<Umbi asi ihwɛngmbi agben unyaka arherhe ha? Ude umbi awuri ikorhu uguse na ahwɛng agben unyaka arherhe akɔɔ?

¹⁴ Uner irham hã adoi Arherhu-Num.

¹⁵ Abɔɔ awu ru nyaki ikpũyɛ iki igba nú utsĩndĩ, anangkɛ umbɔ aka adoi arherha ha, kanying Ushaitan aba atsũwũka arherhe ha aka adoi ru umbɔ.

¹⁶ Abirabɛ aka awu ru nyaki ikpũ iyiriyɛ umbɔ aka adoi nú abĩ ifa, agũ arherha ha, kanying umbɔ ayei ake nggu itenamɛn.

¹⁷ Bɔr umbɔ aka ashimbɔ ra anũnang, umbɔ adãrhĩ ivanga ukunjiir. Ivang ayetnum use uver iki iba ri itsi arherha ha, kanying umbɔ abvui azĩmbɔ ra andzing.

¹⁸ Ikei abɔɔ, awu ru nyaki ikpũyɛ iki idoi ri ididɔk, agũ arherhe ha,

¹⁹ bɔr igũ ighong abin upfung, nu irhirhɛm ibee iwu ru ubin nu ikpona abina akɔɔ itsĩ ikɛnke arherha ha ighwighwɛr.

* **4:12** Àka anyã ikei: Uish 6.9,10.

²⁰ Abɔɔ, awu ru nyaki ikpũɛ iki idoi na abĩ aka aze, agũ arherha ha, na ayɛi ake akũ atɔ itser nggu ake, aghwɛr ikpũrhã iyɔɔ isɔka itaitaar, iyɔɔ isɔka utɔtɔĩ, iyɔɔ ananaka.>>

Irhirhang afafã
(Irh 8.16-18)

²¹ Uyesu agɔr umbɔ agɛ, <<Umbi aka isaka agaar irhirhang awɔkmbi ru ikikĩĩ? Use atsuke ngge ra ada ukoma? Ishingge rimi, ugɛse umbi aka isaka aden ngge ru anang idɛɛke afafã?

²² Abinkɛ aka awu ri iwɔk, umbɔ awuri inyãmbɔ ake, abinkɛ aka awoyi ikɛi, awuri inyinyãmbɔ ake nu awiya.

²³ Ubɛn unerwi aka awu ra ato akika agũ, neke unga agũ.>>

²⁴ Na agɔr umbɔ agɛ, <<Àka akpeto na agũ. Ugbiu ha ungo uku ukũ umei, awuri ikũ umgbɔ amei adzaa ungo, awuri itomuwanmbɔ ungo.

²⁵ Uwuruwi aka awe ru ihwihwɛng awuri itomuwe unga akpo arherhɛ. Uwuruwi aka ashia, awuri iyɛse ungwɛrhĩ ihwihwɛng ha unga aka awerangge.>>

Unyaka arherhe ikpũ iyiki isiseng

²⁶ Na agɔr agɛ, <<Iyɛrhe Unum iwuri iminɛ. Unera adoi ikpũ nu icangnga.

²⁷ Utsuu nu atenum, unga arha na asok, utseki ikpũ hã iki imɛr iseng, uner ha asi ihwɛnga ubinkpi uku ukorhe.

²⁸ Abĩ nibikake atsu ikpũ imɛr, atirhi akũ agam adzeka, na akũ azang adzeka, nu azanga akũ ishaanga idzeka.

29 Ivang ishaanga iki ikṣ, unga aka ikũ ikon agber, ivang iyiki igber iki iwe.>>

*Unyaka arherhe ishaa umustad
(Umat 13.31-32,34; Irh 13.18-19)*

30 Uyesu ikɛi age, <<Umum ikpangu Iyerhe Unum nggu use, umum ikũ unyaka arherhe aka-song idɛyiwe ngge iki iwe?

31 Iwu ru nyaki ishaa ikpũ umastad, iyiriyɛ ngge iki iwe iyiki icia ri ikpũ abin iyiki idoi nu abĩ.

32 Umbɔ aka idoi ngge, ngge iki isaki iseng igɔngngge abinkɛ umbɔ aka adoi ra abĩ, nggu abokngge akagɔng anunu aka isaka acipuwa akang ashiake nu ake.>>

33 Nggu urherhe unyaka arherhe Uyesu aka akũ asɔme anera Arherhu-Num, ri ihwihwɛngmbɔ.

34 Asi isɔmuka umbɔ ubin rimi ru umbɔ uku ushikpɔ ru unyaka arherhe. Bɔr ivangyɛ unga aka awu nggu angwɛ imesanga ikiyikambɔ, unga aka isaka asɔmuka umbɔ agbena.

*Uyesu adɔte ugba inai
(Umat 8.23-27; Irh 8.22-25)*

35 Ru unum hã urhɛɛ uku uwe, unga agɔr angwɛ imesanga age, <<Umɛn inggar udiku ukpɔrɔ.>>

36 Umbɔ abɔre ikikɔng anera, umbɔ ashupa unga nggu umbɔ, ru ukhukhɔɔ amɛ unga aka aseɪ ru umgbɔ. Akhukhɔɔ akɔɔ ikɛi awu umɔ.

37 Nggaɔ ugba ukom ukerketakpɔ usoyi, amɛ ukau ha ukwɛr ukhukhɔɔmbɔ, utsɛku umgbɔ ubɔr ukunjiir ri ididɛɛ ra amɛ.

38 Uyesu awu ru urhɔ ra akpok ukhukhɔɔ nu ubin ukpuku utsorhi itsi. Angwɛ imesanga azita

unga agər agε, <<A umarhem, ungo usi igũo ighong umən iki iwuri itsĩmen?>>

³⁹ Unga asok, atserhu ugba ukukom hã agər amẽ ukau ukugəng hã agε, <<Unukutata! Udəər!>> Məce ugbaa ukpekpə, ananga kishoo anukutata uku ughwəw.

⁴⁰ Unga agər angwẽ imesanga agε, <<Awu use utsu umbi agũ iwei rimi? Umbi ana ashimbi ri imangmang?>>

⁴¹ Umbə agũ iwei akarhār hã agər adəkambə agε, <<Awu ungaa nuwi? Ugba ukom nu ubvun amẽ agũna unga!>>

5

Uyesu akerhuwe uner ipfu iyiki ibewe (Umat 8.28-34; Irh 8.36-39)

¹ Umbə azĩ atsĩ ugar ukau abĩ Ugarasa.

² Ivang Uyesu aka adzeku ukhukhəw, unga ag-bang nggu uner ipfu iyiki ibewe aka adzeka ra anang aka adzak aner.

³ Uner ha ase i ra anang akika adzak aner, unera asi iděě abowpa unga uko nggu inyāwã.

⁴ Umbə aka isaka abow aboknga nu adaknga nggu inyāwã, bər unga aka isaka apupuwe ngge na abvũ iwe azəu aki adaknga. Unera ashia ri iker iyiki ikpəm unga.

⁵ Nu utsuu na atenum unga agheta ra anang akika adzak aner nu ígũ anu itsuyi ívum na akũ atarh angwã iyornga.

⁶ Unga aka anyã Uyesu ukukaa, unga atĩtser aba atararhu ra anangnga.

⁷ Atsarhi irhaknga atsu ívum agε, <<Awu use utoma ungo nggu umum, Uyesu, Ungwẽ Unum uwuku Ugong? Uyirh itsok Unum ugε ungo usi ídzaango umum uver!>>

⁸ Ubinkutsu Uyesu aka agɔra unga agε, <<Up-fudzeka ru utsak uwurε, ungo ípfu iyiki íbewe!>>

⁹ Uyesu arhusa unga agε, <<Itsokngo igburh ungamɔ?>>

Unga agε, <<Itsokmum igburh Ukpusha, ubinkutsu umεn iwu irhεεmεn.>>

¹⁰ Unga ashōrhũ Uyesu akarhārhā utsur unga awayika umbɔ adzembɔ ra anang hã.

¹¹ Arhede arherhε aka adẽẽ ughāwã akhapa ri igũa.

¹² Ípfu iyiki íbewe ha ishōrhũ Uyesu igε, <<Uma udena umεn izĩ ru arhede akɔrɔ, itsĩ ra ake.>>

¹³ Nggee unga abemuka ípfu iyiki íbewe ha idzek izĩngge ru ikpui arhede ha. Ikpui arhede ha itsĩngge anaka agonga avaa, ake asok atĩtser, ahwarha acipa atsĩke ru ukau atsĩmke ra amẽ.

¹⁴ Abi idzεu arhede ha atĩ azĩ asɔme uteumbɔ nu ukpuku ukhapa umɔ adzise isarhe, anera adzeyi aba inyã ubinkpi uku ukorhe.

¹⁵ Umbɔ aka aba atsĩ ru Uyesu umbɔ anyã utsak ha ukpui ípfu iyiki íbewe ha iki iwe ru unga, aseí umɔ atsim atorho ri iyornga amεnnga awu uku urhirhiki, iwei ífer umbɔ.

¹⁶ Abirabε aka anyã íferha ha iki ikorhe adzowe isarhe abinkε aka akorhe nggu uner ukpui ípfu iyiki íbewe nu ikpui arhede ha.

¹⁷ Mɔcε anera atirhi ishōrhũ Uyesu unga abɔre abĩmbɔ.

¹⁸ Uyesu awuri itsĩ ru ukhukhɔɔ amẽ nukpi, ut-sak ha ípfu iyiki ibewe ha iki idzeku unga ashõrhũ Uyesu ama aneke unga adɔsa unga.

¹⁹ Bɔr Uyesu asi inekuka unga. Agɔr unga agɛ, <<Uzĩ ri iya ra angwẽmbi, usɔme umbɔ abin aka agɔngkɛ Uteijee aka akorhuwa ungo, nu atorhkɛ unga aka agũ ru ungo.>>

²⁰ Nggee utsak ha, azĩ atsĩrhã ri iteu usɔka umbɔ iki iyisa Udikaforhi adzise isarhe, abinkɛ Uyesu aka akorhuwe unga. Anera kishoo adzeidzeu.

*Unapa Uyayiru nu utserh uwuku
urhong adzirh*

(Umat 9.18-26; Irh 8.40-56)

²¹ Ikɛi ivang Uyesu aka agar ugar ukpɔrɔ ru ukhukhɔɔ amẽ, anera arherhɛ akɔng adziir unga nu ubang ukau ha.

²² Mɔcɛ unying ra anggbaashi ubã ifɛn-Num it-soka igburh Uyayiru, aba umɔ. Unga aka anyã Uyesu, unga agba ra adaknga,

²³ ashõrhã unga agɛ, <<Ungwẽrhũ unapmum akpurha abɔr akpe. Umum ishõrhã ungo uba utsorhu ubokngo nu unga akerhe na abɛk.>>

²⁴ Nggee Uyesu azĩã nggu unga.

Anera arherhɛ aka afĩ adɔsa unga.

²⁵ Utserh uwɔɔ umɔ aghong irhãrhã umẽẽ imɛka usɔkdũmɛn.

²⁶ Irhãrhãnga ighong unga akarhãrhã ri ivangyɛ abi agɔu arherhɛ aka anɛta unga. Afere ubinkpi unga aka awerakpɔ kishoo, bɔr asi igũa ugarh, irhãrhã ikpurhi idẽẽ ititoma.

27 Ivangye unga aka agũ isarhe Uyesu, unga adɔsa unga ra andzing ri ikikɔnga, aba abanga atorho Uyesu,

28 ubinkutsu unga akaiferhkɔ ra amɛnnga age, <<Umun ũba ũbangumun atorhanga ukpekũ, umun iwuri ikerhumun.>>

29 Kanying umẽẽnga udẽẽkpɔ, nu unga agũã ri iyornga aka akerhunga ru ayetnumnga.

30 Kanying Uyesu agũ ijee iki idze ru unga. Unga adzipa ri ikikɔnga arhusa age, <<Ungamɔ abanga atorhamun?>>

31 Angwẽ imesanga agɔr unga age, <<Ungo unyã anera arherhe afĩã ungo rimine ungo ugɔr uge, <Ungaa abanga umun?> >>

32 Bɔr Uyesu arhi adziir abee inyã uwuku ukorhu ubin hã.

33 Mɔce utserh ha, aka ahweng ubinkpi uku ukorhuwe unga, aba nggu iwei nu izang iyor, agba ra anangnga adeyiwe unga kishoo idzidzerhe.

34 Unga agɔr unga age, <<A unapmun, imangmango ngge ikerhuwa ungo. Uzĩ uku utɔɔ, ayetnumnga aka amaake.>>

35 Uyesu ana awu ra arherhe nukpi, nu anera adzeki iya Uyayiru unggbaashi ubã ifɛn-Num hã, aba agɔr age, <<Unapungo aka akpea. Awu use utsu ungo unu idzowe umarhem ayetnum?>>

36 Bɔr Uyesu akwɛete arherhambɔ, agɔr unggbaashi ubã ifɛn-Num hã age, <<Niba ugũa iwei, uwe ru imangmang ukpekũ.>>

37 Asi ineke unera azĩã nggu unga, akpurha akũ Ubitru, nu Uyaku, nu Uyohana ungwẽmbɔ Uyaku.

³⁸ Ivang umbɔ aka azĩ atsĩ ri iya unggbaashi ubã ifen-Num hã, Uyesu anyã idzidzunambɔ, nu anera aka aciu akpe atsui ivum.

³⁹ Unga atsĩ agɔr umbɔ agɛ, <<Awu use utsu umbi aciu akpe na atsui ívum rimi? Una hã anasi ikpea awu ru urhɔ!>>

⁴⁰ Bɔr umbɔ anyĩrhã unga.

Nggee unga atsu umbɔ adzek ra awiya, unga akũ utesa nu uyisa una hã nu angwẽ imesanga hã abika awu nggu unga, atsĩ ra anangke una hã aka awe.

⁴¹ Adzur ubok una hã agɔr agɛ, <<Tarhita kumi!>> agbena agburh <<Unakuci, umum igɔr ungo, usisok!>>

⁴² Kanying una hã asok azẽrhã adziir. Imeknga iwu usɔkdũmɛn. Akɛɛ ha atsu umbɔ adzeidzeu akarhãrhã.

⁴³ Uyesu agbiite atombɔ akarhãrhã ugɛ umbɔ niba adɛyikumbɔ unera. Ikei unga agɔr umbɔ adzowe ubingha ru una hã.

6

Akpɛmbɔ Uyesu ru Unazarat (Umat 13.53-58; Irh 4.16-30)

¹ Uyesu asoka umɔ abvui azĩã Unazarat utepunga, angwẽ imesanga azĩ nggu unga.

² Unum ukpuku uwosha uku uwe, unga atirha amesuwe ru ubã ifen-Num, anera arherhɛ aka agũ unga, adzeidzeu na arhusa agɛ, <<Utsak uwurɛ akpo abin akɛɛ ri inɛɛ? Adzowe unga itsoi iyɛɛ ri inɛɛ unga aka anu ikorha abin idzeu?

³ Uwerɛ ha asi iwea ukapinta ha, ungwẽ Umaryamu, ungwẽmbɔ Uyaku, nu Uyusuf, nu

Uyahuda nu ikɛi Usiman? Asi iwea anapumbɔ abɛ nggu umɛn?>> Umbɔ akpɛmbɔ unga.

⁴ Uyesu agɔr umbɔ agɛ, <<Uwuku usɔm Arherhu-Num aka isaka akpoa igɔng ru ubɛn ananga, akpurha asheru utepunga nu anernga nu abi iyanga.>>

⁵ Unga asi idɛɛ akorhunga abin idzeu nggɔɔ ha, unga akpurha atsorhuwe abok nu abi irhãrhã ukunjiir akerhuwe umbɔ.

*Uyesu adene angwɛ imesanga
(Umat 10.5-15; Irh 9.1-6)*

⁶ Unga adzeidzeu umbɔ aka ashimbɔ ri imang-mang.

Mɔɔɛ Uyesu atsĩrhã adziir íteu iyiki ici umɔ hã amesuwe anera.

⁷ Unga ayisa angwɛ imesanga usɔkdūmɛn hã azĩ ru unga, unga adene umbɔ ivaivaa na adzowe umbɔ ijee ri itsi ípfu iyiki ibewe.

⁸ Unga agɔr umbɔ agɛ, <<Niba anyangumbi ubin ru uzêrhã hã, umbi akpurha akpɔm igbong, niba akpɔmmbi ubingha, use ijara, use uhwek ri íbvuk atorhambi.

⁹ Àka atsu abadak bɔr niba akpɔmmbi atorho akɔɔ.

¹⁰ Ubɛn iya umbi aka itsĩ, àka aseɪ umɔ utsɛku unumkpi umbi aka isok ru uteu ha.

¹¹ Ubɛn anangke umbɔ aka asi iyeimbɔ umbi use aba asi ikpembɔ ato ru umbi, àka awashuwe uzurhu adakmbi ivangye umbi aka isok, umgbɔ uwu ideka iyiki ibewe ra atsimbɔ.>>

¹² Umbɔ adzek adzowe isarhe ugɛ anera adzipa.

¹³ Umbɔ atsusuwe ípfu iyiki ibewe írheirhe, na adzukuwe atsei ra abí írhãrhã arherhe akerhuwe umbɔ.

Akpe Uyohana Uner Ubɔtisima
(Umat 14.1-12; Irh 9.7-9)

¹⁴ Uyerhe Uhiridu aka agũ abin akere kishoo, ubinkutsu umbɔ ahweng itsok Uyesu imaa ananga. Abɔɔ age, <<Uyohana Uner Ubɔtisima unga asok ra akpe. Ngge itsu unga awe ru ijee iyiki ikorha abin idzeu ha.>>

¹⁵ Abɔɔ age, <<Awu uner uwuku usɔm Arherhu-Num Uirhiya.>>

Abɔɔ igambɔ age, <<Awu uner uwuku usɔm Arherhu-Num uwɔɔ, uwu abi isha.>>

¹⁶ Ivangye Uhiridu aka agũ akere, unga age, <<Uyohana, unerwi umum iki izharhuwe itsinga, unga asoka akpe!>>

¹⁷ Ubinkutsu Uhiridu nibikanga atsumbɔ adzur Uyohana, abow unga na atsuke ru ugborzĩ, ri itsi Uhirudiya. Utserha ungwẽmbɔ Ufirhibu unga aka apfunu.

¹⁸ Uyohana aka isaka arherhu Uhiridu age, <<Asi izea ungo uku upfunu utserha ungwẽmbi.>>

¹⁹ Nggee Uhirudiya agũ avɔm Uyohana na abee ifere unga. Bɔr Uhiridu asi ibemuka.

²⁰ Ubinkutsu Uhiridu agũ iwei Uyohana na agana unga, ahwenga Uyohana arhika na awu usarkasar uner. Uben ivangye Uhiridu aka igũ arherhu Uyohana, unga aka isaka adzununga, rimi hã unga anang agũiben ikpeto ru unga.

²¹ Ri imimasha ivanga ibangge ru Uhirudiya. Ru unum imar Uhiridu ivangye unga aka azek

irhowa, ayisa ayeŕhe abĩnga kishoo nu akagɔng abi iwa, nu akakũ abi Ugarhirhi.

²² Ivangye unapa Uhirudiya aka atsi azer azer, ake atsi ra amen Uhiridu nu atsennga.

Nggee uyeŕhe agɔr una hã age, <<Urhusa umum ubinkpi ungo uku ubee, umum iwuri idzaamum ungo.>>

²³ Unga ayirh nggu uyirh abemuwe una hã age, <<Uben ubinkpi ungo uku urhusa umum iwuri idzaamum ungo, utseku uteng iyeŕhamum.>>

²⁴ Una hã adzek azi arhusu uyanga age, <<Umun iwuri irhusu use?>>

Uyanga agɔr unga age, <<Itsi Uyohana Uner Ubɔtisima.>>

²⁵ Kanying una hã abvui ati aziã ru uyeŕhe agɔr age, <<Umun ibee icere ungo udzaa itsi Uyohana Uner Ubɔtisima ri itêrhĩ.>>

²⁶ Amen Uyeŕhe aghong akarhãrhã, bɔr uyirhnga aka ayirh ra asu atsennga, itsu unga asi idêê akena unga.

²⁷ Nggee kanying unga adene undɔsu uyeŕhe akũ itsi Uyohana akũ aba. Utsa ha azi azharhe itsi Uyohana ru ugborzi.

²⁸ Akũ itsi ha ri itêrhĩ akũ aba. Adzowe ru una hã, unga ayei adzowe ru uyanga.

²⁹ Angwê imesu Uyohana aka agũ isarhe ha, umbɔ aba ashupu ukom Uyohana adzake.

Uyesu afuka anera anakagɔnga atɔɔ

(Umat 14.13-21; Irh 9.10-17; Uyoh 6.1-14)

³⁰ Uner itser Uyesu akɔng adziir Uyesu na adeyiwe unga kishoo abinke umbɔ aka akorhe na amesuwe.

³¹ Mɔcɛ, anera arherhe aka anu iba na adzek utseku umbɔ asi ikpombɔ ivang igha ubin, unga agɔr umbɔ agɛ, <<Àka aba nggu umum umɛn izĩ ra anangke anera aka ashimbɔ umɔ, umɛn iwosha ukunjiir.>>

³² Nggee umbɔ atsĩ ukhukhɔɔ amɛ azĩmbɔ anangke anera aka ashimbɔ umɔ.

³³ Bɔr umbɔ aka isoka anang hã, anera arherhe aka anyã umbɔ ahwɛngmbɔ umbɔ. Atĩ ra adak adzeyi ri íteu kishoo, anggbaashia azĩ atsĩmbɔ ru umbɔ.

³⁴ Uyesu aka acipa ru ukhukhɔɔ anyã arherha anera aka akɔng. Unga agũ atorh umbɔ, ubinkutsu umbɔ awu ru nyaki ídɔi iki ishingge ru uner idzɛu. Nggee unga atirha amesuwe umbɔ abina arherhe.

³⁵ Unum uku uyo itsitsĩ, nggee angwɛ imesanga aba agɔr unga agɛ, <<Anera ashimbɔ ra anang akɛɛ, nggayɛ unum uku uwuri itsĩkpɔ.

³⁶ Udene anera umbɔ atsĩ íteu nu ícang iyiki ikhapa nggimi agoi ubin umbɔ aka igha.>>

³⁷ Bɔr unga agɔr umbɔ agɛ, <<Umbi àka adzowe umbɔ ubin umbɔ agha.>>

Umɔ umbɔ agɔr unga agɛ, <<Ugɛ umɛn izĩ igoi ubingha ukpu imang uner itser afɛɛ utɔrɔk! Umɛn izĩ ifɛre imang iyɛɛ ru ubingha ni idzowe umbɔ agha?>>

³⁸ Unga agɔr umbɔ agɛ, <<Umbi awu ra aborodi asong nggu umbi? Àka azĩ arhi.>>

Umbɔ aka azĩ arhi, umbɔ agɛ, <<Aborodi atɔɔ, nu aberh avaa.>>

³⁹ Uyesu atsu umbɔ agɔr anera aseɪ ukpukpusha nu ubĩĩ uku usum.

⁴⁰ Nggee umbɔ asei ukpukpusha abɔɔ ananaka abɔɔ isɔka itɔitɔɔ.

⁴¹ Unga aka anyangu aborodi ha ikitɔnake nu aberh ha ikivarhake, aberi itsinga arhi afã, atar uwεε na atsɔku uborodi ha. Mɔcε unga adzise angwẽ imesanga umbɔ akũ azĩ adene anera. Ikei unga agashuwe aberh ha ikivarhake ru umbɔ kishoo.

⁴² Kishoo agha, ashuurmbɔ.

⁴³ Angwẽ imesa arhɔyĩ awushu uborodi ha nu aberh ha atɔk azĩnga usɔkdūmen.

⁴⁴ Irhε anera aka agha ubingha ha, akatsak awu anakagɔnga atɔɔ.

*Uyesu azêrhũ uzêrhã afafã nu amẽ
(Umat 14.22-36; Uyoh 6.15-21)*

⁴⁵ Kanying Uyesu atsu angwẽ imesanga atsĩ ru ukhukhɔɔ amẽ agbaashia azĩ ugar Ubetsaida, na asoyiwe ikikɔnga.

⁴⁶ Unga aka asoyiwe umbɔ amaa, unga afũã igũ azĩã ifεn-Num.

⁴⁷ Urhεε uku uwe, ukhukhɔɔ amẽ hã uwe ra ateu ukau, unga awu ikiyikanga nu abĩ.

⁴⁸ Unga anyã angwẽ imesanga atẽwã ikpikpayi, ugba ukεnkpɔ umbɔ izĩ ra asu. Utsar ukpu akara ataar aki utsuu unga azĩã ru umbɔ, azêrhã afafã nu amẽ ukau ha. Unga abee ifara umbɔ atɔng,

⁴⁹ bɔr umbɔ aka anyã unga azêrhã afafã nu ukau amẽ hã, umbɔ atsar ugε awu imãrhã. Umbɔ atsu ivum,

⁵⁰ Umbɔ aka anyã unga, umbɔ agbipa kishookambɔ.

Kanying unga arherhe arherhe nggu umbɔ agɛ,
<<Àka aker amɛnmɛbi! Awu umum. Niba agũmbi
iwei!>>

⁵¹ Unga atsĩã ru ukhukhɔɔ nggu umbɔ, mɔcɛ
ugbaka ukpekpɔ. Umbɔ adzeidzeu akarhãrhã,

⁵² umbɔ asi ihwɛngmbɔ agben aki ubingha ukpu
inera anakagɔnga atɔɔ hã, ubinkutsu, amɛnmɛbɔ
asi iyɛike.

⁵³ Umbɔ aka agar ukau ha, umbɔ acipa ra abĩ
Ujanisarat, abope ukhukhɔɔ amɛ hã nu angwĩ
ukau ukugɔng hã.

⁵⁴ Uɓɛn umbɔ aka adzek ru ukhukhɔɔ amɛ hã,
kanying anera ahwɛngmbɔ ugɛ awu Uyesu.

⁵⁵ Umbɔ atĩna adzeyiwa ra abĩmbɔ kishoo akũna
abi irhãrhã ra afarmbɔ akũ azĩ kishoo ra anangke
Uyesu aka awe.

⁵⁶ Kishoo anangke unga aka izĩ, iteu iki igɔng,
use iteu iki ici, umbɔ angwẽwe abi irhãrhã ra
angwĩ anang izɛɛ. Na ashõrhã unga ru abi irhãrhã
hã abangu utɛm ibang atorhanga. Kishoo abirabɛ
aka akpo ibibanga akerhumbɔ.

7

Ugau anggbaashi

(Umat 15.1-9)

¹ Abi Ufarisi nu abɔɔ abika amesuwe Ikpem aka
adzeku Urusharhima aba akɔng adziir Uyesu.

² Na anyã angwẽ imesanga agha ubingha nggu
abok arhim, asi isorhmbɔ abokmbɔ aka awu ag-
beyambɔ.

³ Abi Ufarisi nggu abi Uyahuda kishoo aka isaka
asorh abokmbɔ akata na adɔrha agha ubingha,
ubinkutsu awu ugau agbeyi akakũmbɔ.

⁴ Ivangye umbɔ aka idzeki izεε abvui aba ri iya, asi íghambɔ ubin, umbɔ awuri igbaashia adɔsa agbeyambɔ asorh ayormbɔ kata. Na asorh akpewa nu ídzum amē nu atērhi nu andzoma nu atseu.

⁵ Nggee abi Ufarisi nu abika amesuwe Ikpem arhusu Uyesu age, <<Awu use utsu angwē ime-sango asi idɔsumbɔ ugau akakū na anu igha abin nggu abok arhim?>>

⁶ Uyesu agɔr umbɔ age, <<Irhi-kungge Uishaya aka asɔm Arherhu-Num ra atsimbi abi ukpukpeta age,

<<Aner abere adzaa umum igɔng ra angwī,
bɔr amɛnmbɔ aderke nggu umum.

⁷ Umbɔ adzaa umum igɔng ibɛm,
anu imesuwe ikpem anera ugεε Unum ad-zowe umbɔ.>*

⁸ <<Umbi aka atarkumbi ikpem Unum, umbi adɔsa agau anera.>>

⁹ Na agɔr umbɔ age, <<Umbi aka akpombi anang umbi aka angwēwe Ikpem Unum ngge itsú umbi idɔsa agaumbi!

¹⁰ Umusa agɔr age, <Udzowe imor ru utengo nu uyango,>† nu <Ikɛi, uwuruwi aka arhenu utenga use uyanga, awu ufang umbɔ afere unga.>‡

¹¹ Bɔr umbi aka isaka agɔr age unera aba agɔr utenga use uyanga age, <Ubin hã uwu izūwā iyi Unum.>

¹² Rimi hã, umbi akɛnmbi unga ikorhu ubɛn ubin ayike utenga use uyanga.

* **7:7** Àka anyā ikei: Uish 29.13. † **7:10** Àka anyā ikei: Idzi 20.12; Iva 5.16. ‡ **7:10** Àka anyā ikei: Idzi 21.17; Urha 20.9.

13 Rimi hã umbi afõrhũwe Arherhu-Num na adõsa agbeyi ha umbi aki imesuwe angwẽmbi. Ikei umbi aki ikorhe abin arherhe ru nyaka ha.>>

*Abinkε aki itsu unera asi isara
(Umat 15.10-20)*

14 Ikei Uyesu ayisu ikikõng hã iba ru unga agõr umbõ agε, <<Uben unera akpeto ru umum, aka ahweng akεε.

15 Asi iwea abin awiya aki itsĩ ru unera atsu unga asi isara, abinkε aka idzeyiwa ra amẽn unera atsu unga asi isara ra asu Unum.>>§

17 Unga aka asok ri ikikõng hã na atsĩã ri iya, angwẽ imesanga arhusa unga agben unyaka arherhe ha.

18 Unga agõr umbõ agε, <<Umbi adzuna? Umbi asi ihwengmbi ugε abinkε aka adzeka awiya atsĩ ru unera asi itsu unga asi isara ra asu Unum?

19 Abin hã asi itsĩke ra amẽnnga bõr atsĩ ra anaanga, na adzek ri iyornga.>> Ra arherhe akεε Uyesu adeyiwe ugε abingha kishoo awu asarsa-take.

20 Agε, <<Ubinkpi iki idzeyiwa ra amẽn unera awu ukpõ utsu unga asi isara ra asu Unum.

21 Ubinkutsu iwu ru unõrkang amẽn unera, iferhkõ iyiki ibewe iki idzeyiwa, arhim irha ukutsεrh use ukutsak, nu ivεu, nu ifer uner nu itoma-dak,

22 nu ikpona, nu iyiki ibewe, nu irhirhem, nu anyõna, nu unyẽẽ nu idakuwe itsok, nu iberi itsi nu ibemitsi, nu ikei ishera amẽn.

§ 7:15 Abvur akõõ aki itseng abok aki isha agõrke ikei ugε,
16Kishoo uner ato aka agũ, unga agũ!

23 Kishoo abin aka abewe akεε adzeyiwa ra amεn unera, ake atsu unera asi isara ra asu Unum.>>

Imangmang utsεrh uwɔɔ
(Umat 15.21-28)

24 Uyesu abɔruka anang hã na asok azĩã abĩ Utaya nu Usidon. Atsĩ ri iya ikɔɔ asi ibeenga unera ahwεng, rimi hã unga afɔr iwiwoi adaka.

25 Idzidzεrhe, kanying utsεrh uwɔɔ, uwuruwi ungwεrhũ unapunga aka awe ru ipfu iyiki ibewe aka agũ isarhe ri itsinga, aba agba ra adaknga.

26 Awu utsεrh abĩ Uherhini, amar unga udiku ugber uwu Ufinikiya. Unga ashɔrhũ Uyesu ama atsũwe ipfu iyiki ibewe ru unapunga.

27 Uyesu agɔr unga agε, <<Uneke awεkaci agbaashia agha kishoo ubinkpi umbɔ aka abee, ubinkutsu isi irhikungge umbɔ anyangu ubingha awεkaci atsuke íjui.>>

28 Bɔr utsεrh ha agε, <<Ĩĩ, Uteijee, bɔr ru adak utebur íjui iki isaki ighangge awushu ubingha aka idze ra abok awεkaci agbei.>>

29 Uyesu agɔr unga agε, <<Iwu idzidzεrhe, uzĩ ri iya, ipfu iyiki ibewe iki idzengge ru unapungo.>>

30 Unga abvui azĩ ri iya anyã unapa anu nu ukoma, ipfu iyiki ibewe iki idzengge ru unga.

Uyesu akerhuwe ugbau uwuku
ufɔr arherhe adaka

31 Mɔcε Uyesu adzek udiku ugber Utaya adɔsu udiku Usidon, azĩã Ukau Ugarhirhi nu utsĩndĩ uku uzĩ iteu usɔka umbɔ iki iyisa Udikaforhi.

³² Nggɔɔ ha umbɔ aka akowe unga uner igbau uwuku ufɔr arherhe adaka, umbɔ ashɔrhã unga atsorhu ubok nu uner ha.

³³ Nggee Uyesu adarhu uner igbau ha akũ azĩã, adzeka ri ikikɔng hã, atsu itoknga ra ato utsak ha. Unga atar aci akũ abanguwe arhem utsak ha.

³⁴ Na abere arhi afafã agbiir uwoi ughorgho-takpɔ, agɔr unga agɛ, <<Iffata! >> Agbena agɛ, <<Uyanga!>>

³⁵ Kanying unga aka arherhe rimi, ato utsak ha ayanga, urhemnga ugarhe unga atirhunga arherhe azezee.

³⁶ Uyesu atsu umbɔ niba adɛyikumbɔ unera. Bɔr ubɛn unga aka ikɛn umbɔ, umbɔ anang adɛɛ isɔme anera.

³⁷ Anera agũ na adzeidzeu kishoo agɛ, <<Heee! Akorhe ubɛn abina azezerake. Atsu ugbau agũã arherhe, uwuku ufɔr arherhe, arherhe azezee.>>

8

Uyesu afuka anera anaka agɔnga anaa (Umat 15.32-39)

¹ Ri inum hã anera abɔɔ arherhe akɔng. Umbɔ aka ashimbɔ ru ubinkpi umbɔ aka igha, Uyesu ayisa angwɛ imesanga umbɔ azĩ ru unga na agɔr umbɔ agɛ,

² <<Umun igũ atorh anera abɛɛ. Unum untaar nukpi umbɔ awu nggu umum na ashimbɔ ru ub-ingha.

³ Umum ĩba isoyikũ umbɔ azĩ ri iya nggu imerh, umbɔ awuri igbambɔ nu utsĩndĩ, ubinkutsu abɔɔ adzeki inang iyiki ider.>>

⁴ Angwẽ imesanga agor unga age, <<Umən inyã ubingha ri inεε ukpu umẽẽ ighigha anera abεε ra arhum akεε?>>

⁵ Uyesu arhusa umbɔ age, <<Umbi awe ru ipo uborodi isong?>>

Umbɔ age, <<Utɔɔva.>>

⁶ Unga agor ikikong hã iseisa abĩ. Ivangye unga aka anyangu aborodi ha utɔɔva, atar uwεε ru Unum, na atsoka ake agasha adzise angwẽ imesa umbɔ adene ru anera, umbɔ akorhe rimi hã.

⁷ Umbɔ awembɔ ru angwẽrhã abεrh ukunjiir, unga atar uwεε ra ake ikεi, unga agor umbɔ agashuwe ikikonga.

⁸ Anera agha ashur, angwẽ imesa arhõĩ akika abubor ake atok azĩnga utɔɔva.

⁹ Irhe anera aka agha, atsĩmbɔ anaka agonga anaa. Mɔce Uyesu asoyika anera umbɔ azĩmbɔ.

¹⁰ Kanying unga atsĩ ukhukhɔɔ amẽ nu angwẽ imesanga, azĩã abĩ Udarhmanuta.

Ibee atsar

(Umat 16.1-4; Irh 12.54-56)

¹¹ Abi Ufarisi abɔɔ aba atirhi uning nggu Uyesu. Avira unga, umbɔ abee unga akorhuwe abin idzeu ake awu utsar uge unga adzeka afã.

¹² Unga agber usepa ughoghor na age, <<Awu use utsu umbi aner undan ukpirε abee inyã atsar? Umum indeyiwa umbi idzidzerhe, utsar ushikpɔ umbɔ aka ideyiwe ukpɔ.>>

¹³ Mɔce unga aboruka umbɔ, atsĩ ukhukhɔɔ amẽ, agar azĩã ugar ukpɔɔ.

Uguga abi Ufarisi nu Uhiridu

(Umat 16.5-12)

14 Angwẽ imesu Uyesu ayirukumbɔ asi ikũmbɔ uborodi. Akpurha awe ru ipoa unying ukpekũ ru ukhukhɔɔ amẽ hã.

15 Uyesu agbiite atombɔ agɛ, <<Àka akpɔm amɛnmɔ nggu uga abi Ufarisi nu uwu Uhiridu.>>

16 Angwẽ imesa ha atirhi irherhe nggu adɔka agɛ, <<Arherhe rimi ubinkutsu umɛn iki isi ikũmɛn uborodi.>>

17 Unga ahwɛng arherhakɛ umbɔ aka arherhe, unga arhusa umbɔ agɛ, <<Awu use utsu umbi anu igɔr ugɛ umbi ashimbi ru uborodi? Utɛku icɛɛ umbi asi inyã ahwɛngmbi? Amɛnmɔ awe ru igbau?

18 Umbi awu ra asu na asi inyãmbi, na awembi ra ato na asi igũmbi? Umbi asi iyitumbi,

19 ivangyɛ umum iki igashuwe anera anaka agɔnga atɔɔ nggu aborodi atɔɔ? Azĩnga asong umbi aka akarha akika abɔr?>>

Umbɔ agɛ, <<Usɔkdũmɛn.>>

20 <<Ivangyɛ umum iki itsɔku ipo aborodi utɔɔva ha, umum iki igashuwe anera anaka agɔnga anaa, azĩng akagɔng asong umbi aka akarha atɔk?>>

Umbɔ agɔr unga agɛ, <<Utɔɔva.>>

21 Unga agɔr umbɔ agɛ, <<Utɛku icɛɛ umbi asi ihwɛngmbi?>>

Akerhuwe uner ibvuta ru Ubetsaida

22 Umbɔ aka aba Ubetsaida, abɔɔ akũ uner ibvuta ashɔrhũ Uyesu abangu uner ibvuta ha.

23 Unga adzur ubok uner ibvuta ha akũna unga adzek aziã undzing utepa. Ivangyɛ unga aka ashapa aci ra asu utsak ha na atsorhu ubok nu unga, Uyesu arhusa agɛ, <<Ungo udẽẽ unyã ubin ukpɔɔ?>>

²⁴ Unga abera asunga na agε, <<Inyāmum anera, umbō awu ru nyaka acucii iki izērḥã.>>

²⁵ Uyesu abvui abanga asu utsak ha. Mōce utsak ha ayangi ikpor asunga ugeii, asunga akerhuke, unga anyã abina uku ushashaki.

²⁶ Uyesu adene unga azĩã ri iya, agε, <<Niba ubvui uzĩō udiku utepa.>>

*Ubitru adeku Uyesu unga awu Ukiristo
(Umat 16.13-20; Irh 9.18-21)*

²⁷ Uyesu nggu angwē imesanga azĩmbō, atsĩrhĩ iteu iki ici iyi Ukaisariya Ufirhibi. Nu utsĩndĩ unga arhusa angwē imesanga agε, <<Anera anu igōr agε umum iwu ungamō?>>

²⁸ Umbō agōr unga agε, <<Abōō agε ungo uwu Uyohana Uner Ubōtisima, abōō agε, ungo uwu uner uwuku usōm Arherhu-Num Uirhiya, abōō agε ungo uwu unying ra abika asōm Arherhu-Num.>>

²⁹ Unga arhusa umbō agε, <<Bōr umbi agōr uge umum iwu ungamō?>> Ubitru agōr unga agε, <<Ungo uwu Ukiristo.>>

³⁰ Uyesu agbiite atombō utsur umbō adεyikumbō unera ubinkpi unga aka awe.

*Uyesu asōm ikpũ akpeke
unga aka ikpe*

(Umat 16.21-28; Irh 9.22-27)

³¹ Unga atirha amesuwe umbō agε, <<Ungwē-Ner awuri ihwa uver ra abina arherhe nu akakũ nu ateiya abika adzowe idεm-Num, nu abika amesuwe Ikpem, awuri ikpēmbō unga. Awuri ifere unga, ru unum untaar unga awuri isoka nggu urhe.>>

³² Arherhe akεε ha ra awiya. Nggee Ubitru adarha unga azĩ ri ifena atirhi itserha unga.

³³ Bør Uyesu adzipa arhi angwē imesa ha, atserhu Ubitru age, <<Usəkə ru umum Ushaitan! Ungo uwu utarh ukpuku ukwēr itok ru umum, iferhkongo iwe ru nyaki iyi anera, isi iwengge ru nyaki iyi Unum.>>

³⁴ Məce unga ayisa anera nu angwē imesanga aba ru unga, unga agər umbə age, <<Unera aba abeenga idəsa umum, awu ufang unga akpēē itsinga na ashipu igārḥāmau ucucianga adəsa umum.

³⁵ Ubən unerwi aka abee ifərḥ urhenga, umgbə uwuri igwir, bər uwuku ugwirhuwe urhenga ru ubokmum nu Isarhe Iyiki Ize afufərḥ umgbə.

³⁶ Izea iwu use unera akpo abin upfung kishoo na asi ikpoa urhenga?

³⁷ Use unera awuri ikū use ukpə uwe ifare urhenga?

³⁸ Unera aba agūā atsakmum nu arherhamum ru udan ukpuku ushe irhirhika ukpīε ukpu itoma-dak nū arhim, Ungwē-Ner awuri igigūa at-sak uner ha ri ivangyε unga aka iba ri ikpikpoi Utenga nggu ípfu itser-Num isarsatangge.>>

9

¹ Unga agər umbə age, <<Uмум indəyiwa umbi idzidzerhe, abəə rabə adēē nggimi awuri inyāmbə ijee Iyerhe afā kata na adərha akpe.>>

*Idzidzipu iyor Uyesu
(Umat 17.1-13; Irh 9.28-36)*

² Inuma utāi iki imaa Uyesu akū Ubitru, nu Uyaku, nu Uyohana, afū igū iyiki ider ikiyikambō. Umō iyor Uyesu idzipa iwiwengge ra asumbō.

³ Atorhanga ikēi awu akaterha uku upērḥēng uku unyar-nyar, anangke isisorh unera ru upfung ukpirε.

⁴ Mōce abika asōm Arherhu-Num Uirhiya nu Umusa akapeng ra asumbō, adēē arherhe nggu Uyesu.

⁵ Ubitru agōr Uyesu agε, <<A umarhem, azea umεn iki iwe ri nggimi, uneke umεn itar atsurha ataar, unying uwu ungo, unying uwu Umusa, unying uwu Uirhiya.>>

⁶ Unga asi ihwengnga ubinkpi unga aka arherhe, ubinkutsu umbō agū iwei akarhārḥā.

⁷ Mōce amεε adzek aba atsire umbō, urhem udzek ra amεε ha, ugōr ugε, <<Uwεε awu Ungwēmum, uwu umum iki ibema. Àka akpe ato ru unga!>>

⁸ Kanying, umbō aka arhi adzipa, asi inyāmbō unera akpurha anyā Uyesu ikiyikanga nggu umbō.

⁹ Umbō aka azērḥā acipuwa ru igū ḥā, Uyesu ag-biite atombō ugε niba adεyikumbō unera ubinkpi umbō aka anyā utsεku Ungwē-Ner aka isoka akpe.

¹⁰ Ngge itsu umbō angwē arherhe ha ra amεnmbō, na arhusa adokambō agε, <<Awu use uwu agben isoka akpe?>>

¹¹ Umbō arhusa unga agε, <<Awu use utsu abika amesuwe Ikpem anu igōr ugε awu ufang uner uwuku usōm Arherhu-Num Uirhiya agbaashia aba?>>

¹² Uyesu agər umbə agɛ, <<Awu idzidzɛrhe Uirhiya agbaashia aba agbishi ifɛrhɛ kishoo. Awu use utsu itsɛng igər igɛ awu ufang Ungwɛ-Ner ahwa uver urhɛrhɛ umbə akpɛmbə unga?

¹³ Bər umum indɛyiwa umbi Uirhiya aka abanga, anera akorhuwe unga ubinkpi umbə aka abee, ru nyaka ngge iki itsɛng ri itsinga.>>

*Ikikerhe uwɛkuci uwu
ipfu iyiki ibewe*

(Umat 17.14-23; Irh 9.37-45)

¹⁴ Uyesu nggu angwɛ imesanga hã ikitatambə abvui aba ra angwɛ imesanga, umbə anyã nggaa ikikəng iki idzipa umbə nu abika amesuwe Ikpem adɛɛ uning nggu umbə.

¹⁵ Kanying umbə aka anyã Uyesu, kishoo ikikəng hã idzedzeu akarhãrhã, asok atītser azĩ aghwe unga.

¹⁶ Uyesu arhusa angwɛ imesanga agɛ, <<Umbi adɛɛ uning use nggu umbə?>>

¹⁷ Uner uwəɔ ri ikikəng hã adzipuwe agɛ, <<A umarhem, nggawi umum ikũwã ungo ungwɛmum, uwuruwi aka awe ru ipfu iyiki ibewe iki ikɛnngge unga arherhe.

¹⁸ Ivangyɛ ngge iki isok ru unga, iki isaki itare unga ra abĩ. Itsu unga adzeyi ufuu ra angwĩnga, anu ishang anyĩ, iyornga idɛɛ ikerketangge. Umum ĩgər angwɛ imesango ama atsũwe, bər umbə afər adambə.>>

¹⁹ Uyesu agər umbə agɛ, <<Umbi abi udan ukpirɛ, abika asheri imangmang, abi amɛn aka abewe. Umum iki isei ĩdãrhũmum nggu umbi, ukang umbi aka awe ru imangmang ru umum?

Uteku ukang umum iki ibima nggu ida imang-mangmbi? Ukũ ungwẽ hã uba nggẽ ru umum.>>

²⁰ Nggee umbõ akũ unga aba. Ivangyẽ ipfu iyiki ibewe iki inyã Uyesu, kanying ngge ikwẽr ungwẽ hã iyornga izang. Unga agba agõrhã, ufuu ikei udzeyi ra angwĩnga.

²¹ Uyesu arhusu ute ungwẽ hã agẽ, <<Ukang iferhẽ ha iki itirhi ru unga?>>

Ute ungwẽ hã agẽ, <<Itirhi unga ana awu uwẽkuci ukunjiir.

²² Iki isaki itare unga ru urha, nu amẽ, ibee ifere unga. Bõr ungo uba udẽẽ ukorhukõ ubin, uma ugũ atorh umen uma uyika umen.>>

²³ Uyesu agõr unga agẽ, <<Awu use utsu ungo urhusa ugẽ umum ĩba idẽẽ imẽmum? Uben iferhẽ iwengge ru uwuruwi aka awe ru imangmang.>>

²⁴ Kanying ute ungwẽ hã atsarhi irhaknga agẽ, <<Umun iwemum ri imangmang, uma uyika umun ingbiki iwerangge!>>

²⁵ Uyesu aka anyã ikikõng hã iki itĩ iba, unga atserhi ipfu iyiki ibewe ha agẽ, <<Ungo ipfu iyiki ibewe iyiki itsu igbau ni ikẽn arherhe, umun itsu ungo upfudzek ru unga, niba ubvui utsĩõ ru unga ikei!>>

²⁶ Ipfu iyiki ibewe ha itsu ivum, izung ungwẽ hã mõcẽ ngge idzekngge. Ungwẽ hã anu ru nyaku ukom, nggee irhẽ anera igõr ugẽ, <<Aka akpea.>>

²⁷ Bõr Uyesu adzur uboknga aberuwe unga nu adaknga, unga asok adẽẽ.

²⁸ Uyesu aka atsĩ ri iya, angwẽ imesanga arhusa unga ikiyikambõ agẽ, <<Awu use utsu umen isi idẽẽ itsũwũkumen ipfu iyiki ibewe ha?>>

²⁹ Uyesu agər umbə agε, <<Ikpū idzidzek iyεε iwuri iwe ri ifen-Num ukpekū.>>

³⁰ Umbə asokmbə ra anang hā, azēr hā atəng ru Ugarhirhi. Uyesu asi ibeenga anera ahweng anangkε umbə aka awe,

³¹ ubinkutsu anu imesuwe angwē imesanga. Agər umbə agε, <<Awuri ighambə adak Ungwē-Ner adzowe unga ra abok anera. Umbə awuri ifere unga, inuma itaar iki itəng unga awuri isoka.>>

³² Bər umbə asi ihwengmbə agben arherhanga, na agū iwei irhusa unga.

Ungaa awu uwuku ugənga?

(Umat 18.1-5; Irh 9.46-48)

³³ Ivangyε umbə aka azī atsī Ukafanahum, ivangyε unga aka awe ri iya, unga arhusa umbə agε, <<Umbi adēē uning use ru utsīndī?>>

³⁴ Bər umbə anukutata, ubinkutsu nu utsīndī umbə adēē uning ugε ungaa awu uwuku ugənga ru umbə.

³⁵ Uyesu aseī, na ayisa umbə usəkdūmən hā, agər umbə agε, <<Uben unera aka abee iwu ukugəngmbi, awu ufang unga awu uwuku ucia, ikei na awu ugār hāmbi kishoo.>>

³⁶ Unga ashupu ungwēr hū uwεkuci atsu unga adēē ra ateumbə. Unga ashupa unga awuma ra aboknga, agər umbə agε,

³⁷ <<Uwuku uyei ungwēr hū uwεkuci ru nyaku uwεε ri itsokmum, ayei umum nukpə, uwuruwi aka ayei umum ayei uwuku udena umum ība.>>

*Uwuruwi aka asi ikpēē umən
awu uwu umən
(Irh 9.49-50)*

³⁸ Uyohana agɔr unga agɛ, <<A umarhem, umɛn inyã uner uwɔɔ anu itsusuwe ipfu iyiki ibewe ri itsokngo, umɛn ikɛnmɛn unga, ubinkutsu asi iwea nggu umɛn.>>

³⁹ Bɔr Uyesu agɔr unga agɛ, <<Àka niba akɛnmɛn unga. Unera asi íkorhunga ubin idzeu ri itsokmum amaa na arherhunga iki ibewe ri itsimum.

⁴⁰ Ubɛn unerwi aka asi ikpɛɛ umɛn awu uwu umɛn.

⁴¹ Umum indɛyiwa umbi idzidzɛrhe, kishoo uwuku udzaa umbi ukpɛwa amɛ aka ahwa ri itsokmum ugɛ umbi awu abi Ukiristo, umum indɛyiwa umbi idzidzɛrhe awuri ikpoa ugɛtanga.

Abin aka itsu igbigba ra arhim

(Umat 18.6-9; Írh 17.1-2)

⁴² <<Ubɛn uwuruwi aka itsu unying ra awɛkaci abika awe ru imangmang ru umum agba ra arhim, ugba umbɔ abope ukɔ igɔ ru urhɔk uner ha na atsuke unga ru ukau ukugɔng.

⁴³ Ubokngo uba utsu ungo ugbaɔ ra arhim, uzharhuwe ukpɔ. Azea ungo utsĩ urhɛ uwu ug-bagbaa nggu uboka unying nu ungo uku ineke abokngo ikivarhake atsĩ idzũ urhakpi uku usi írhimkpɔ.*

⁴⁵ Udakngo uba utsu ungo igba ra arhim, uzharhuwe ukpɔ. Azea ungo utsĩ urhɛ uwu ug-bagbaa nggu igbeta nu ungo iki itsĩ idzũ urhakpi uku usi írhimkpɔ nggu adakngo avaa.†

* **9:43** Abvur akɔɔ aki itsɛng abok aki isha agɔrke ikɛi ugɛ, *44Ra anangke adzudzi iki igha, ake asi íkpeke, urha ikɛi usi írhimkpɔ.* † **9:45** Abvur akɔɔ aki itsɛng abok aki isha agɔrke ikɛi ugɛ, *46Ra anangke adzudzi iki igha, ake asi íkpeke, urha ikɛi usi írhimkpɔ.*

⁴⁷ Ishaa usungo iba itsu ungo ugba ra arhim, uhoote ukpɔ. Azea ungo utsĩ Iyɛrhe Unum nggu usua unying nu ungo uku itsĩ ri idzũ urha nggu asu avaa.

⁴⁸ Umɔ,
<< <Adzudzimbɔ asi íkpeke,
nu urha ikɛi usi írhimkpɔ.>‡

⁴⁹ <<Asare anera kishoo nggu urha ru nyaka umbɔ aka ikũ angwã asare idɛm.

⁵⁰ <<Angwã aze, bɔr ake aba ashike ri itonga angwã, ungo ukorhu uguse nu utsu ake atonga ikɛi? Àka awe ra angwã ra atsimbi, na aseɪ uku ughwɔw nggu adɔka.>>

10

Igau itsɛrh

(Umat 19.1-12; Irh 16.18)

¹ Mɔcɛ Uyesu asoka ra anang hã na azĩã ugber uwu Uyahudiya agar Azẽ Urdun. Ikɛi anera arherhe abvui akɔng ru unga, unga amesuwe umbɔ ru nyaka unga aka abayi.

² Abi Ufarisi abɔɔ aba avira unga, arhusa agɛ, <<Ri Ikpem imɛngge unera agau nggu utsɛnga?>>

³ Uyesu agɔr umbɔ agɛ, <<Umusa atsu umbi akorhu use?>>

⁴ Umbɔ agɛ, <<Umusa agɔr umɛn agɛ unera awuri idẽẽ atseng ubvur igau itsɛrh awayika utsɛnga.>>

⁵ Uyesu agɔr umbɔ agɛ, <<Itsã itsimbi itsu Umusa atsenga umbi akɛrɛ ha.

‡ 9:48 Àka anyã ikɛi: Uish 66.24.

⁶ Bər ri inggbaashia <Unum amuna umbə ukut-sak nggu ukutsərḥ.>*

⁷ <Nggee, unera awuri ineke utenga nu uyanga, na anyapa nggu utsēnga.

⁸ Umbə ikivarhambə awuri iwu iyora unying.>† Nggee umbə asi iwembə ivaa bər awu iyora unying.

⁹ Nggee, ubinkpi Unum aka agbopa, unera niba agashuka.>>

¹⁰ Ivangye umbə aka awu ri iya, ikēi, angwē imesa arhusu Uyesu arherhe ha.

¹¹ Unga agər umbə age, <<Uben uwuku ugau itsərḥ nggu utsēnga na apfunu utsərḥ uwukuse, unga awu ra arhim itoma-dak ru unga.

¹² Iwe rimi hā ukutsərḥ aba agau itsərḥ nggu utsaka, na azĩ itsərḥ uner uwukuse, unga atoma-dak.>>

Angwērḥā awəkaci nu Uyesu

(Umat 19.13-15; Irh 18.15-17)

¹³ Anera aka akū angwērḥā awəkaci aba ru Uyesu abanga umbə, bər angwē imesanga atsərha umbə.

¹⁴ Uyesu aka anyā rimi, avəm afeṛ unga. Unga agər umbə age, <<Àka aneke angwērḥā awəkaci aba ru umum, niba akənmbi umbə, Iyerhe-Num iwu iyi ikpũmbə.

¹⁵ Umum indeyiwa umbi idzidzerhe, uben unera aka asi iyēisa Iyerhe-Num ru nyaku uwəkuci, asi ídēē atsĩā ri ngge.>>

* **10:6** Àka anyā ikēi: Ing 1.27. † **10:8** Àka anyā ikēi: Ing 2.24.

16 Mɔcɛ unga ashupa awɛkaci ha ra aboknga awuma na atsorhe abok nu atsimbɔ na atsuke umbɔ idorh.

*Uwɛdzɛm uner ubin
(Umat 19.16-30; Irh 18.18-30)*

17 Uyesu atirhi isisok ra anang hã nukpi, utsak uwɔɔ atĩ aba, atararhu ra anangnga, arhusa unga agɛ. <<A umarhem uwuku uze, umum ikorhu use ni ikpo urhɛ uwu ugbagbaa?>>

18 Uyesu agɔr unga agɛ, <<Awu use utsu ungo uyisa umum uwuku uze? Uwuku uze ashia, Unum ukpekũ awu uwuku uze.

19 Ungo uhwɛngo ikpem iyɛɛ, <Niba uferɔ unera, niba utomungo-dak, niba uvɛpɔ ivɛu, niba ugberɔ angwĩ utsukukɔ unera, niba ughaɔ urha, udzowe igɔng ru utɛngo nu uyango.>‡>

20 Uwɛdzɛm hã agɔr unga agɛ, <<A umarhem, umum iki idɔsumum akɛɛ ha kishoo rimɔɔ utirhi ri iwɛnci.>>

21 Uyesu arhi unga na abema unga, agɔr unga agɛ, <<Ungo usheru ubina unying ukpekũ. Uzĩ, ugoshe abinngo kishoo, udzowe uhwɛka ra atsũwã, ungo uwuri iweɔ ru ugbeta urherhɛ ra afã, mɔcɛ uba udɔsa umum.>>

22 Igũ rimi itsu ungwɛdzɛm hã ashepa asunga, azĩ nggu ida amɛn, ubinkutsu unga awu uner ubin akarhãrhã.

23 Uyesu arhi adziir angwɛ imesanga, agɔr umbɔ agɛ, <<Aghong abika awu ru ubin aki ikpo itsĩ Iyɛrhe Unum!>>

‡ 10:19 Àka anyã ikei: Idzi 20.12; Iva 5.16-20.

24 Angwẽ imesanga adzeidzeu ra arherha ha. Uyesu ikei agɔr umbɔ agɛ, <<Umbi awɛkaci, aghong akarhãrhã unera atsĩ ri Iyerhe Unum!

25 Ighɔrhungge urhakumi utsĩ atɔng ra angwĩ inepurha, nu uner ubin aka itsĩ ri Iyerhe Unum.>>

26 Angwẽ imesa ha adzeidzeu akarhãrhã arhusa adɔka agɛ, <<Ungamɔ awuri idẽẽ akpo ififɔrh?>>

27 Uyesu arhi umbɔ na agɛ, <<Ra anera ngge isi imɛngge, bɔr ru Unum imɛngge. Uben ubina umẽẽkpɔ ra anang Unum.>>

28 Ubitru agɔr unga agɛ, <<Nggayɛ umɛn ineke abina kishoo ni adɔsa ungo!>>

29 Uyesu agɛ, <<Umun indɛyiwa umbi idzidzɛrhe, unera ashia uwuruwi aka neke iyanga, use angwẽmbɔ use anapumbɔ use uyanga use utɛnga use awɛkacinga use icang irhamnga ri itsimum nu Isarhe Iyiki Ize,

30 na asi ikpoa iya, angwẽmbɔ, anapumbɔ, uya, awɛkaci nu icang irham idikunga unaka ru udan ukpirɛ, unga ikpoa uver ikei, ru upfung ukpuku uba unga ikpoa urhe uwu ugbagbaa.

31 Bɔr anera arherhe aka awu abi inggbaashi, awuri iwu ãmaata. ãmaata ikei, awuri iwu angg-baashi.>>

*Uyesu abvui arherha arherhe
ra akpekɛ unga aka ikpe*

(Umat 20.17-19; Irh 18.31-34)

32 Umbɔ awu ru utsĩndĩ uwuku afũrhã azĩ Urusharhima. Uyesu agbaashia nu udĩ hã. Angwẽ imesa adzeidzeu, nu abika adɔsa unga agũ iwei. Ikei unga ayisa angwẽ imesanga usɔkdũmɛn hã ri ibanga adɛyiwe umbɔ ubinkpi iki ikorhe nggu unga.

33 <<Nggayε umεn izĩ ufã Urusharhima. Umɔ awuri ighambɔ adak Ungwẽ-Ner adzowe unga ra abok ateiya abika adzowe idεm-Num, na abika amesuwe Ikpem. Awuri itsu unga ufai akpe na adzowe unga ra atsen abi Uyahuda.

34 Umbɔ awuri iyεia unga na ashau aci atsuke ra asunga, awuri ikwεre unga ugwεε na afere unga. Inuma itaar iki itɔng unga awuri isoka nggu urhε.>>

*Ubinkpi Uyaku nu Uyohana aka afena
(Umat 20.20-28)*

35 Mɔcε angwẽ Uzabadi, Uyaku nu Uyohana, aba ru unga. Agɔr unga agε, <<A umarhem, umεn ibee ungo ukorhuwa uben ubina umεn iki ifena ungo.>>

36 Unga arhusa umbɔ agε, <<Umbi abee umum ikorhuwa umbi use?>>

37 Umbɔ agε, <<Umεn ishɔrhã ungo neke unying ru umεn aseĩ nú ubok ughango, uwu uvaa aseĩ nú ubok uferango ri ikpikpoingo.>>

38 Bɔr Uyesu agɔr umbɔ agε, <<Umbi asi ihwεngmbi ubinkpi umbi aka arhusa. Umbi awuri idẽẽ ahwambi ru ukpεwa uverkpi umum iki ihwa, use umbi awuri idẽẽ akorhumbi ikpũ ubɔtisima uverkpi umbɔ aka ikorhuwa umum?>>

39 Umbɔ agε, <<Ĩĩ, umεn idẽẽ ikorhumεn.>> Uyesu agɔr umbɔ agε, <<Ĩĩ, umbi awuri ihwambi ru ukpεwa umum iki ihwa na awuri akorhumbi ubɔtisima hã umbɔ aka ikorhuwa umum,

40 bɔr iseĩ nu ubok ughamum use ubok uferamum asi iwea umum ĩbemuwa. Inang iyεε iwu iyi abirabε umbɔ aka asεng agbishuwe rimɔɔ.>>

⁴¹ Ivangyε angwē imesa ha usoka aka agũ rimi, umbō agũ avom nggu Uyaku nu Uyohana.

⁴² Uyesu ayisa umbō ananga unying agor umbō age, <<Umbi ahwengmbi ugε abirabε umbō aka anyanga umbō awu ayerhe atsen abi Uyahuda, anu idēyiwe anera iyerhe, anggbaashimbō ikei anu ikũ ijee adarh umbō.

⁴³ Bor isi íwengge rimi ru umbi. Uben uwuku ubee igong ru umbi awu ufang unga awu ugārḥāmbi.

⁴⁴ Ikei uben unera aka abee iwu unggbaashi, awu ufang unga awuri iwu ugārḥā ra anera kishoo.

⁴⁵ Ungwē-Ner asi ibanga umbō atōwe unga itser, bor unga awuri iwu ugārḥā, na adzowe urhenga aforh anera arherhe.>>

Uner itapa akpoa inyā anang

(Umat 20.29-34; Irh 18.35-43)

⁴⁶ Uyesu nu angwē imesanga aka azĩ atsi Ujeriko. Umbō nu anera arherhe, awuri idze utepa, uner itapa agburh Ubartimawu agbena agburh <<ungwē Utimawu,>> aseĩ nu ubang utsĩndĩā anu ifen.

⁴⁷ Ivangyε unga aka agũ ugε Uyesu uner Unazarat unga atong, unga atsarhi irhaknga ayisa age, <<Uyesu Ungwē Udauda ugũ atorh umum!>>

⁴⁸ Anera abō arherhe atserha unga age, <<Unu ukutata!>> Bor unga agbisha atsarhi irhaknga akarḥārḥā ayisa age, <<A Ungwē Udauda, uma ugũ atorh umum!>>

⁴⁹ Uyesu atsurha adēē na age, <<Àka ayisuwa unga.>> Umbō ayisu uner itapa ha, agor unga age, <<Ugōm! Usisok, ayisa ungo.>>

⁵⁰ Unga atare untamanga, na akatasok ater isha, azĩã ru Uyesu.

⁵¹ Uyesu arhusa unga age, <<Ungo ubee umum ikorhuwa ungo use?>>

Uner itapa ha age, <<A Uteiya, umum ibee inyã anang.>>

⁵² Uyesu agor unga age, <<Uzĩõ. Imangmangngo ngge ikerhuwa ungo.>> Kanying unga ayeisa inyĩnyãnga na adosu Uyesu umbõ uzĩmbõ nu utsĩndĩ.

11

*Uyesu atsĩ Urusharhima nggu ininang
(Umat 21.1-11; Irh 19.28-40; Uyoh 12.12-19)*

¹ Umbõ aka aba akhapa ru Urusharhima ru Ubetafaji ru Ubetani Igũ Acucii Uzaitun, Uyesu adene angwẽ imesanga avaa.

² Agor umbõ age, <<Àka azĩ ru ungwẽrhũ uteu ukpõõ ra asumbi, uben itsitsĩmbi, umbi awuri inyãmbi ungwẽ uzhika umbõ aka abow, unera aka anasi ifũã umgbõ. Àka agarha umgbõ akũ aba.

³ Unera aba arhusunga umbi age, <Awu use umbi akorhe rimi?> Àka agor unga age, <Uteijee unga abeea umgbõ unga awuri ibvui adene umgbõ uba kanying.> >>

⁴ Umbõ azĩ anyã ungwẽ uzhika uku udẽẽ ru ubang utsĩndĩã, ubow ra angwĩ iya. Umbõ atirhi igarha umgbõ.

⁵ Abirabẽ aka adẽẽ umõ arhusa umbõ age, <<Awu use utsu umbi agarhu ungwẽ uzhika ha?>>

⁶ Umbɔ adzipa arherhe ubinkpi Uyesu aka adɛyiwe umbɔ. Aner ha neke umbɔ akũ ungwẽ uzhika ha azĩmbɔ.

⁷ Ivangyɛ umbɔ aka akũ ungwẽ uzhika ha aba ru Uyesu na abɛtuwe antamambɔ nu undzingmbɔ, Uyesu afũ aseɪ nu umgbɔ.

⁸ Anera arherhe abɛtuwe antamambɔ nu utsĩndĩã, abɔɔ agbɛyi ayerhe ri icang abɛtuwe nu utsĩndĩã.

⁹ Abika awu ra asunga na abika aba ra andzingnga atsui ivum agɛ,

<<Ikpikpoi iwe ru Unum!*

Idorh iwe nggu unga aka aba ri itsok Uteijee!

¹⁰ Idorh iwe ri ibiba iyɛrhe utɛmɛn Udauda!

Ikpikpoi iwe afafã ra afã.>>

¹¹ Uyesu aka atsĩ Urusharhima, azĩã ri Iya-Num atsĩ arhisa abina kishoo. Nggayɛ unum uku utsĩkpɔ, nggee unga abvui adzek azĩã Ubetani nggu angwẽ imesanga usɔkdũmɛn.

Uyesu atsuke ikponum ru uvorhvo

(Umat 21.18-19)

¹² Ukpe unum uvaa umbɔ aka asoku Ubetani, imerh ifɛr Uyesu.

¹³ Unga aka anyã ucucii uvorhvo ukukaa uku ukpusha ayerhe udẽẽ, unga azĩã ibee ikpũrhã ru umgbɔ. Ivangyɛ unga aka azĩ atsĩ ru umgbɔ, unga asi ikpoa ubin, ayerhe ukpekũ ake akpusha adẽẽ, ubinkutsu, asi iwea ivang ikpũrhũ uvorhvo.

¹⁴ Mɔcɛ unga agɔr uvorhvo ha agɛ, <<Unera niba abvui aghaa ikpũrhãngo ugbagbaa!>> Angwẽ imesa igambɔ agũmbɔ ubinkpi unga aka arherhe.

* **11:9** Àka anyã ikei: Amb 118.26.

Uyesu asare Iya-Num

(Umat 21.12-17; Irh 19.45-48; Uyoh 2.13-22)

¹⁵ Umbɔ aka atsĩ Urusharhima, Uyesu atsĩ ri Iya-Num atirha awayiwe abika agoi igoi nu abika agoyiwe umɔ. Akwɛr atsime atebur abika afaruwe uhwɛk nu anang isei abika agoyiwe anurhɛu.

¹⁶ Akɛna anera ikũ ubin ukpuku ugoiwe atɔng ra angwĩ Iya-Num.

¹⁷ Unga amesuwe anera agɛ, <<Itsɛng Arherhu-Num isi igɔrngge ugɛ,

<< <Awuri iyisi iyamum

iya ifɛn-Num ri idũa kishoo?†>

Nggayɛ umbi atsu ike iwu utai uwoyi avɛu.‡>>

¹⁸ Ateiya abika adzowe idɛm-Num nu abika amesuwe Ikpem aka agũ arherhe akɛɛ umbɔ abee utsĩndĩ uwuku ufɛre unga, na agũ iwei unga ubinkutsu anera kishoo adzeidzeu imesanga.

¹⁹ Urhɛɛ uku uwe, Uyesu nu angwɛ imesanga adzembɔ ru uteu ha.

Ucucii uvorhvo uwuku usherhe

(Umat 21.20-22)

²⁰ Ru ukpeeka, umbɔ aka atɔng, umbɔ anyã ucucii uvorhvo ha uku ukoyi kishoo nggu anunanga.

²¹ Ubitru ayita na agɔr Uyesu agɛ, <<A umarhem, urhi unyã! Ucucii uvorhvo ha ungo uku utsuke ikponum hã uku usherhumgbɔ!>>

²² Uyesu agɔr umbɔ agɛ, <<Àka awe ru imang-mang ru Unum!

²³ Umum indɛyiwa umbi idzidzɛrhe, unera aba agɔr igũ iyɛɛ agɛ, <Utang itsingo ugba ru ukau

† 11:17 Àka anyã ikei: Uish 56.7. ‡ 11:17 Àka anyã ikei: Uiri 7.11.

ukugɔng,> unga aba asi icicanga ra amɛnnga nu ubinkpi unga aka arherhe, na awea ri imangmang awuri ikorhukumbɔ unga.

²⁴ Nggee umum idɛyiwa umbi, ubɛn ubinkpi umbi aka ifɛna ru ifɛn-Num, aka awe ru imangmang ugɛ umbi aka akpombi ukpɔ, ukpɔ iwuri iwu ukpumbi.

²⁵ Ikei ubɛn ivangyɛ umbi aka idɛɛ na afɛn-Num, umbi aba awɛmbi ra avɔm nggu unera, aka atsũwe uner ha, nu Utɛmbi uwu afã atsũwã umbi ra arhimmbi.>>§

Acucang ijee Uyesu

(Umat 21.23-27; Irh 20.1-8)

²⁷ Umbɔ aka abvui atsĩ Urusharhima, Uyesu atsĩ azɛrhã ri irhɛrh Iya-Num nukpi, umɔ ateiya abika adzowe idɛm-Num, nu abika amesuwe Ikpem nu anggbaashi anera aba ru unga.

²⁸ Agɔr unga agɛ, <<Ungo ukũ ijee iyikisong unu ikorhe ifɛrhɛ iyɛɛ ha? Ikei ungaa adzaa ungo ijee iyiki ikorhi ifɛrha ha?>>

²⁹ Uyesu agɔr umbɔ agɛ, <<Umun irhusa umbi ubina unying. Àka adzipuwa umum, umum idɛyiwa umbi umum ikũ ijee ungaa ikũ ikorha abin hã.

³⁰ Ubɔtisima Uyohana udzeka afã use udzeka anera? Àka adɛyiwa umum!>>

³¹ Umbɔ akɛki itsũwã nggu adɔkambɔ, agɛ, <<Umun iba igɔr ugɛ, <Udzek ra afã,> unga awuri

§ 11:25 Abvur akɔɔ aki itsɛng abok aki isha agɔrke ikei ugɛ, 26 Bɔr itsitsũwe iba ishingge, rimi hã, Utɛmbi uwu afã asi itsũwanga arhim umbi.

irhusa umɛn agɛ, <Awu use utsu umbi ashimbi ri imangmang ru unga?>

³² Bɔr umɛn iba igɔr ugɛ, <Udzek ra anera,> umɛn igũ iwei anera abɛrɛ, ubinkutsu, umbɔ anyangu Uyohana awu uner uwuku usɔm Arherhu-Num.>>

³³ Nggee umbɔ agɔr Uyesu agɛ, <<Umɛn isi ihwɛngmɛn.>>

Uyesu agɔr umbɔ agɛ, <<Umun igamum isi idɛyiwamum umbi umum ikũ ijee iyikisong iko-rha abin hã.>>

12

*Unyaka arherhe aki abi irham imang
(Umat 21.33-46; Irh 20.9-19)*

¹ Uyesu arherhe unyaka arherhe adzise umbɔ, agɛ, <<Utsa uwɔɔ akau icang inebi, adzin ufɔm adzipuwe icang hã, asim ughwee ri ifa ukpuku up-ayi amɛ ikpũrhũ inebi ha, ikɛi atar akang utsurha udedetamgbɔ uwu idzɛu. Mɔcɛ unga atsu abɔɔ abi irham imang ri icang hã, na azĩã abĩ akase.

² Ivang iyiki ikɔng inebi ha iki iwe, unga adene ugãrhãnga azĩ ra abi irham imang ri icang hã, ayeise ikpũrhũ inebi ri icang hã.

³ Bɔr abi irham imang hã adzur ugãrhã hã, akwɛr unga, na awayiwe unga nggu abok aka atãrhã.

⁴ Mɔcɛ unga adene ugãrhũ uwɔɔ, umbɔ akwɛr uwu ha ni itsia, na ayeia unga.

⁵ Unga anang adene uwɔɔ, uwu ha umbɔ afɛrkumbɔ unga. Unga adene abɔɔ arherhɛ, abi irham imang hã akwɛr abɔɔ, na afere abɔɔ.

⁶ <<Unga abɔra unera unying unga aka idene, ungwɛnga aka abema. Unga adene unga uwu imaataka, na age, <Awuri idzowukumbɔ igɔng ru ungwɛmum.>

⁷ <<Bɔr abi irham imang hã agɔr adɔkambɔ age, <Uwuku ugha ukam icang hã nuwi. Àka aba umɛn ifere unga, nu icanga iwu iyimɛn.>

⁸ Nggee umbɔ adzur unga afere unga, na atare ukoma ru undzing ufɔm icang hã.>

⁹ Uyesu arhusa umbɔ age, <<Uner icang hã awuri ikorha aguse? Awuri iba atsĩme abi irham imang hã na adzowe icang hã ra abɔɔ.

¹⁰ Umbi aka avarhumbi ri itsɛng Arherhu-Num akirakɛ aka agɔr uge,

<< <Utarhkpi abi idzin aka akpɛ, ukpɔ uwu utarh āgboki idzin.

¹¹ Uteijee ha unga akorha akɛɛ, awu ubin igbigba ra asumɛn.>*>

¹² Mɔcɛ umbɔ abee udĩ ukpuku udzur unga, ubinkutsu umbɔ ahwɛngmbɔ uge arherhe unyaka arherhe ha iwu ra atsimbɔ. Bɔr umbɔ agũ iwei anera, ngge itsu umbɔ neke unga na azĩmbɔ.

Arhusu ifai ikirbi abĩ ru Ukaisar

(Umat 22.15-22; Irh 20.20-26)

¹³ Akɛɛ aka amaa umbɔ adene abi Ufarisi abɔɔ nu aner Uhiridu umbɔ azĩ adeyi Uyesu ri irhem arherhanga.

¹⁴ Umbɔ aba agɔr unga age, <<A umarhem, umɛn ihwɛngmɛn ungo urhiku uner. Anera kishoo awu ubina unying ru ungo, ubinkutsu amɛngo ashike nggu iwiwe uner, bɔr ungo umesuwe utsĩndĩ

* **12:11** Àka anyã ikei: Amb 118.22,23.

Unum ri idzidzerhe. Ungo unyã imëngge umen ifase ikirbi abĩ ru Ukaisar use isi imëngge?

¹⁵ Umen ifai use umen neke ififai?>>

Bor Uyesu ahwenga ukpukpetambɔ. Unga agor umbɔ age, <<Awu use utsu umbi andeya umum? Àka akũwã ishāa imang hã umbɔ iki ikũ afai ikirbi abĩ ru umum inya.>>

¹⁶ Umbɔ aka akowe ishāa imang hã, unga arhusa umbɔ age, <<Uzirhzĩ ukpire nu itsok ikere iwu iki ungamɔ?>>

Umbɔ age, <<Iki Ukaisar.>>

¹⁷ Uyesu agor umbɔ age, <<Àka adzowe Ukaisar ubin ukpunga na adzowe Unum ubin ukpu Unum.>>

Umbɔ adzeidzeu akarhãrhã ru unga.

*Arhusa arherhe isoka akpe
(Umat 22.23-33; Irh 20.27-40)*

¹⁸ Abi Usaduki abɔɔ, abika agor age isok ra akpe ishingge, aba ru Uyesu nggu irhirhusa.

¹⁹ Agor unga age, <<A umarhem, Umusa atsenga umen uge unera aba akpea na abore utsenga ashia ra awekaci, awu ufang ungwẽmbɔ anyangu utsẽrhãpfu ha amare awekaci ru ungwẽmbɔ.

²⁰ Abɔɔ rabɔ utɔɔva awu angwẽ uyi akatsak. Uwu inggbaashia apfuna, na akpe ashia ru ungwẽ.

²¹ Uwu uvaa ikɛi apfunu utsẽrhãpfu ha, iganga akpea, ashia ru ungwẽ. Uwu untaar rimi hã.

²² Rimi hã kishookambɔ utɔɔva ha, asi iborukumbɔ ungwẽ. Ri imimasha utsẽrhãpfu ha ikɛi akpea.

23 Ri isok ra akpe awuri iwu utserha ungamo ru umbo? Ubinkutsu kishookambo utova apfunumbo unga.>>

24 Uyesu agor umbo age, <<Umbi asi igbambi irhak umbi aka asi ihwengmbi itseng Arherhu-Num use ijeenga?

25 Ivangye abika akpukpe aka isok, asi ipfunumbo use adzowukumbo ipfuna, umbo awuri iwe ru nyaki ipfu itser-Num ra afã.

26 Ra arherhi isok ra akpe, umbi anasi ivarhumbi akere ha ru ubvur Umusa, ri isarhe ufum uku ugar urha? Unum aka agor Umusa age, <Unum iwu Unum uwu Uibrahim, nu uwu Uishaku, nu ikai uwu Uyakubu.>†

27 Unga asi iwea Unum uwu abika akpe, bor unga awu uwu abi urhe. Umbi agba irhak iki ibewe!>>

Ikpem iki igong

(Umat 22.34-40; Irh 10.25-28)

28 Utsa uwow uwuku umesuwe Ikpem aba agũ umbo adẽẽ uning nggu adoka. Unga aka agũ uge Uyesu adzowe umbo irhem iyiki ize, unga arhusa unga age, <<Kishoo ikpem, iyikisong iwu iki igonga?>>

29 Uyesu agor unga age, <<Iki igonga iwu nggẽẽ age, <Aka agũ umum umbi abi Uisrairha, Utejee Unummẽn, awu Utejee unying.

30 Ubemu Utejee Unumngo nggu amẽnngo kishoo, nggu urhengo kishoo, nu ihwihwengngo kishoo, nu nggu ikerngo kishoo.>‡

† 12:26 Àka anyã ikai: Idzi 3.6. ‡ 12:30 Àka anyã ikai: Iva 6.4,5.

³¹ Iyi ivaa ha igε, <Ubemu undakango ru nyaka ungo uku ubemi itsingo.>§ Íkpem iyɔɔ isi inangnge iyεε ha.>>

³² Uwuku umesuwe ikpem ha agər Uyesu agε, <<Ungo urhika ra arherhango uku urherhe ugε Unum awu unying uwɔɔ ashia bər unga.

³³ Ubema unga nggu amɛnnɔ kishoo, nu ihwihwɛngngɔ kishoo nu ikerngo, nu ubemu udakango ru nyaki itsingo, ananga izũwã iyiki ikpikpĩ nu idɛm-Num.>>

³⁴ Uyesu aka agũ unga arherha arherhe itsoi, unga agər unga agε, <<Ungo uku ukhapungo nggu Iyεrhe Unum.>> Mɔcε unera asi irhusunga ubin ukpɔɔ.

*Arhusa arherhe ri itsi Ukiristo
(Umat 22.41-46; 23.1-36; Irh 20.41-47)*

³⁵ Uyesu aka adẽẽ amesuwe ru ufɔm Iya-Num unga arhusa agε, <<Awu use utsu abika amesuwe Ikpem anu igər agε Ukiristo awu ungwẽ Udauda?

³⁶ Udauda nibikanga, ri ijee Ipfu Isarsatangge unga agər agε,

<< <Uteijee agər Uteijeemum agε,

usei ru ubok ughamum,

<<Utsɛku umum iki itsu anggamtsakngo

ru andaidakngo.>> >*

³⁷ Udauda nibikanga ayisu Ukiristo agε, <Uteijee.> Awuri ikorha aguse ru Uteijee awu ungwẽ ru Udauda?>>

Nggaa ikikɔng anera ikpeto ru unga nggu itenamɛn.

§ **12:31** Àka anyã ikei: Urha 19.18. * **12:36** Àka anyã ikei: Amb 110.1.

*Uyesu ayare igoi abika amesuwe Ikpem
(Umat 23.1-36; Irh 11.37-54; 20.45-47)*

³⁸ Ri imesanga, Uyesu agər agɛ, <<Àka akpəm amɛnm̩bi nggu abika amesuwe Ikpem, umbɔ abee itsĩm atorhɔ akagɔng azɛrhã, abee anera aghwe umbɔ ri inang izɛɛ,

³⁹ ikɛi umbɔ abee anera adzise umbɔ anang isei aka aze ra abã ifɛn-Num, nu anang isei aka aze ra anang irhowa.

⁴⁰ Umbɔ awu abika aghawe abin atsɛrhãpfu na avur ayambɔ, na adarhi ider ifɛn-Num iyi igbana. Ikpũ umbɔ awuri itsu umbɔ ufai akarhãrhã.>>

*Izũwũ utsɛrhãpfu
(Irh 21.1-4)*

⁴¹ Uyesu aseɪ ri ifɛna ra anangkɛ umbɔ iki itsu izũwã ri Iya-Num, azɛrhe anera iki itsuyiwe uhwek ri ijara izũwã. Abɔɔ abi ubin arhɛrhɛ atsu uhwek urhɛrhɛ.

⁴² Mɔcɛ utsũwũ utsɛrhãpfu uwɔɔ, aba atsuke ungwɛrhĩ íshaa imang ivaa iki isi iwengge ubin.

⁴³ Uyesu ayisa angwɛ imesanga aba ru unga, agər umbɔ agɛ, <<Umum indɛyiwa umbi idzidzɛrhe, ubinkpi utsũwã utsɛrhãpfu uwurɛ aka atsu ri ijara izũwã hã, inangngge iyimbɔ aka adzowe kishoo.

⁴⁴ Kishoo adzowe ra arhɛrha abinmbɔ aka awe, bər unga ri itsũwãnga, unga adzowe kishoo ubinkpi unga aka awe ra ukpɔ.>>

13

*Uyesu asəm ikpũ isisipa Iya-Num
(Umat 24.1-35; Irh 21.5-33)*

¹ Uyesu adzeka ri Iya-Num nukpi, unying ra angwẽ imesanga agor unga age, <<A umarhem, urhi unyã nggaa atarh akere, nu idzin iyere!>>

² Uyesu agor unga age, <<Ungo unyão nggaa idzin iyere? Awuri isipuwe ngge kishoo. Asi inekukumbo utarh unying nu undakakpo.>>

³ Uyesu ase i ni itsi Igũ Acucii Uzaitun iki idẽẽ ra asu Iya-Num. Ubitru, Uyaku, Uyohana nu Uandarawu arhusa unga ri iwak age,

⁴ <<Usoma umen, iferha ha ikorhu ukang? Ut-sara uwu uguse umbõ aka inyã ri ivangye ngge iki itirhi ikorhe?>>

⁵ Uyesu agor umbõ age, <<Åka arhi anyã, utsur unera arhema umbi.

⁶ Anera arherhe aka idzeka ri itsokmum, anu igor age, <Uмум iwu unga,> umbõ awuri irhem anera arherhe.

⁷ Ivangye umbi aka igũ isarhe iwa nu ugbugbewangge, niba asoyimbi amenmbi. Awu ufang akere ha akorhe, bõr imimasha ina ishingge kata.

⁸ Abi abĩ akoo asok adẽẽ igamtsak nggu abi abĩ akoo, iyerhe iso idẽẽ igamtsak nggu iyerhe. Abĩ awuri izizusa ri inanga irheirhe, nu ikpo imerh iwuri itsiãwãnge. Awu ititirhi uver imar.

⁹ <<Awu ufang umbi adzeu. Awuri ikũna umbi azĩ ra abi ijee iyerhe na akwer umbi ra abã ifen-Num. Awuri ikũna umbi azĩ ra asu anggbaashi nu ayerhe ri itsimum, ubinkutsu umbi awuri iwu idekamum ra asumbõ.

¹⁰ Awu ufang umbõ aka igbaashia adzowe Isarhe Iyiki Ize ri idũa kishoo kata, ri imimasha idorhi iba.

¹¹ Uben ivangye umbɔ aka idzur umbi akũ azĩ ra aya ayerhe, aka niba agũmbi ighong ru ubinkpi umbi aka irherhe. Aka arherhu uben ubinkpi umbɔ aka idzaa umbi ri ivang hã, ubinkutsu, asi íwea umbi irherhe ri ivang hã, awu Ipfu Isarsa-tangge.

¹² <<Ungwēyi awuri idzowe ungwēmbɔ umbɔ afere, utei ikei awuri idzowe ungwēnga. Awekaci ikei awuri iwu ri igamtsak nggu ateimbɔ utseku umbɔ aka itsu umbɔ afere umbɔ.

¹³ Anera kishoo awuri ikpēna umbi ri itsok-mum. Bɔr uwuku ubima utseku imimasha awuri ikpoa ififorh.

¹⁴ <<Ivangye umbi aka inyã ubin ishĩ ukpuku ukũ itsitsĩme udēēkpɔ ra anangke aka asi imēke, abika awu ru Uyahudiya atĩrhã azĩ ri ígũ, neke uner uwuku uvarhe ahweng.*

¹⁵ Uwuruwi aka awe ri itsi uvi niba acipuwanga inyãngu ubin ri iya.

¹⁶ Uwuruwi aka awe ra arhum ikei niba abvui abanga inyãngu untamanga.

¹⁷ Atorhmbi akatsɛrh abika awu ra ana nu abika akpɔm awekaci ri ivang hã!

¹⁸ Aka afen-Num utsur iferhe ha ikorhungge ri idoyi.

¹⁹ Ri ivang hã awuri ihwambɔ ayetnum akarhãrhã akirake aka anasi ikorhuke udzur ri ivangye Unum aka amunu upfunga, utseku icere. Asi íbvui akorhumbɔ ikpũ hã ugbagbaa.

²⁰ Uteijee aba asi ishoyika inum hã, unera uny-ing asi íbeka. Bɔr ru ubok abirabe unga aka aseng, unga ashoyika inum hã.

* **13:14** Àka anyã ikei: Udan 9.27; 11.31; 12.11.

²¹ Ri ivang hã unera aba agɔra umbi age, <Àka anyã, Ukiristo uwi!> use <Àka anyã, nggawɔ!> niba awembi ri imangmang ra ake.

²² Ukiristo igberangwĩ nu abika asɔm Arherhu-Num igberangwĩ awuri idzidzeka, awuri idɛyiwe atsar nu abin idzeu akũ arhem anera nggu abirabe Unum aka aseng, umbɔ aba adẽẽ amẽẽmbɔ.

²³ Nggee, àka arhi! Umum iki idɛyiwamum abina kishoo ake adɔrha aba.

²⁴ <<Bɔr ri ivang hã, ayetnum akika aba ha aka imaa,

<< <awuri itsu ishaa unum iwu uzĩ.

Ufẽ ikei usi írhangmgbɔ.

²⁵ Ídɛɛr idzeka afã igbei.

Ikei awuri izizusa nggaa abinke aka awu afafã ra afã.>†

²⁶ <<Mɔɛ Ungwẽ-Ner aka icipuwa ra amɛɛ nggu nggaa ijee nu imor.

²⁷ Mɔɛ unga awuri idene ípfu itsernga nggu at-som aki irhak ayisa, na awuri ikɔng abirabe umbɔ aka aseng ra anggbokunga anaa, udiku igɔkpee nu udiku urhɛɛ nu unɔr nu ufã, udzur ru ubandzin upfunga udiku ukpɛɛ uzĩ udiku ukpɔɔ.

²⁸ <<Àka amesu ubin ukpɔɔ ru ucucii uvorhvo. Umbi aba anyã aboke apfum adzeka nggu ayerhe aka afa, umbi ihweng uge isung ameka iki iyongge.

²⁹ Rimi hã ikei umbi aba anyãmbi iferhe iyere itirhungge, umbi ahweng uge ivanga iki iyongge, iki ibangge ra angwĩã.

† 13:25 Àka anyã ikei: Uish 13.10; 34.4.

³⁰ Umum indeyiwa umbi idzidzerhe, udan ukpirɛ usi ítongkpɔ utseku iferhe ha kishoo iki ikorhe.

³¹ Afã nggu abĩ awuri ítongke, bɔr arherhamum asi ítongke.

*Unera asi ihwɛnga unum ibiba Ukiristo
(Umat 24.36-44; Irh 17.26-30,34-35)*

³² <<Unera asi ihwɛnga unum hã use ivang hã, ípfu itser-Num ra afã isi ihwɛngngge, Ungwẽ-Ner asi ihwɛnga, Ute ukpekũ unga ahwɛng.

³³ Àka arhi, àka agbisha adzɛu, ubinkutsu umbi asi ihwɛngmbi ivanga ngge iki ikorhe.

³⁴ Awuri iwe ru nyaku uner uzẽrhã. Ivangyɛ unga aka isok, unga idzowe iya ra agãrhãnga, ubɛn unera awea ri itsernga aka itõ. Mɔcɛ unga aka itsu uner idzɛu, unga agbisha adzɛu.

³⁵ <<Nggee àka adẽẽ adzɛu, ubinkutsu umbi asi ihwɛngmbi ivangyɛ uner iya ha aka ibvui aba, use ru urhɛka, use ri ikɔtsuuka, use ri ivang ikɔ iki igbɛr ukpee, use ru unkpeeka.

³⁶ Utsur unga aba umbi asi ihwɛngmbi, unga akpo umbi awu ru urhɔ.

³⁷ Ubinkpi umum iki ideyiwa umbi, umum indeyiwe ubɛn unera, aka agbisha aseɪ adzɛu!>>

14

*Anggbaashi akɛki itsũwã
iyiki ifere Uyesu*

(Umat 26.1-5; Irh 22.1-2; Uyoh 11.45-53)

¹ Abɔr inuma ivaa umbɔ azek Irhowa Iyiki Igar Utɔng nu iyi Uborodi Ukpuku Usheru Uguga,

ateiya abika adzowe idεm-Num nu abika ame-suwe Ikpem abee utsĩndĩwi umbɔ aka idzur Uyesu ri iwɔk afere unga.

² Umbɔ anu igɔr agε, <<Bɔr asi íwea ri ivang irhowa, utsur anera awuri isoyi amεnmbɔ.>>

*Adzukuwe Uyesu atsei isung
ru Ubetani
(Umat 26.6-13; Uyoh 12.1-8)*

³ Uyesu awe ru Ubetani ri iya utsa uwɔɔ umbɔ iki iyisa Usiman uner ingbim, awuri igha ubingha nukpi, utserh uwɔɔ aba nggu ungwērḥũ udzoma utɔk nggu atsei isung aki imang akarhārḥā aki ikũ unardi ayang. Unga ayar udzoma hā atsuke atsei ha ri itsi Uyesu.

⁴ Abɔɔ aka awe umɔ agũ avɔm agɔr adɔkambɔ agε, <<Awu use utsu umbɔ atare atsei isung ha ibεm rimi?

⁵ Uda umbɔ agoshe atsei ha atsĩke imang itser unera iyi amεka, umbɔ aka idzowe atsũwā.>> Umbɔ atserhu utserh ha ri ifuw.

⁶ Bɔr Uyesu agε, <<Àka aneke unga. Awu use utsu umbi arherha unga? Awu ubin uku uze unga aka akorhuwa umum.

⁷ Atsũwā awu nggu umbi ubεn unum, umbi adēē ayikukumbi umbɔ ri ivangyε umbi aka abee. Bɔr umum iwuri iwe nggu umbi ivanga ukunjiiir.

⁸ Akorhu ubinkpi ikernga iki imē. Adzukuwa atsei agbishi iyormum iyiki idzidzake.

⁹ Umum indεyiwa umbi idzidzerhe, kishoo anangkε umbɔ aka idzowe Isarhe Iyiki Ize iyεε ru upfunga, awuri isɔmmɔ ubinkpi utserh uwurε aka akorhe umbɔ ayita unga.>>

*Uyahuda Uiskariyoti Agha-dak Uyesu
(Umat 26.14-16; Irh 22.3-6)*

¹⁰ Mɔcɛ Uyahuda Uiskariyoti, unying ra angwɛ imesa usɔkdūmɛn hã, azĩ ru ateiya abika adzowe idɛm-Num nu unga agha-dak Uyesu na adzowe ru umbɔ.

¹¹ Umbɔ aka agũ rimi umbɔ agɔm anggɔm na abemuwe unga uhwɛk. Nggee Uyahuda abee utsĩndĩã unga aka idzowe unga ru ubok.

*Irhowa Iyiki Igar Utɔng iyi imaatak
(Umat 26.17-25; Irh 22.7-14,21-23; Uyoh 13.21-30)*

¹² Ru unum ukpu inggbaashia ukpu Irhowu Uborodi Ukpuku Usheru Uguga, unum ukpuku ungwãni ungwɛ itsurhi iyi Irhowa Iyiki Igar Utɔng, angwɛ imesu Uyesu arhusa unga agɛ, <<Ri inɛɛ ungo uku ubee umɛn izĩ ĩgbishuwa ungo igha Irhowa Iyiki Igar Utɔng?>>

¹³ Nggee unga adene angwɛ imesanga avaa, agɔr umbɔ agɛ, <<Àka atsĩ ru utepa, nggɔɔ umbi awuri igbopumbi utsak uwɔɔ aka atsã idzuma amɛ. Àka adɔsa unga.

¹⁴ Iya ikɛ unga aka itsĩ, àka agɔr uteiya ha agɛ, <Umarhem arhusa ugɛ ubã atsen ungwɛkpɔ, umum iki igha Irhowa Iyiki Igar Utɔng nggu angwɛ imesamum?>

¹⁵ Unga awuri idɛyiwanga nggaa ubã afã ukpɔɔ umbɔ aka atsu abin iya amaambɔ. Àka igbishuwa ubinghamɛn umɔ.>>

¹⁶ Angwɛ imesa ha aka asok atsĩmbɔ ru utepa, anyã abina awe ru nyaku Uyesu aka asɔme umbɔ.

Nggee umbɔ agbishu ubingha Irhowa Iyiki Igar Utɔng.

¹⁷ Urhεε uku uwe, Uyesu nggu angwẽ imesanga usɔkdūmɛn hã aba ri iya ha.

¹⁸ Awuri igha ubingha nukpi, Uyesu agɔr agε, <<Umum indɛyiwa umbi idzidzɛrhe, unying ru umbi aka agha nggu umum awuri ighadak umum.>>

¹⁹ Amɛnmbɔ atirhuke igũ ighong, anu igɔr unga anyinganying agε, <<Asi iwea umum, use awu umum?>>

²⁰ Uyesu agɔr umbɔ agε, <<Unying ru umbi usɔkdūmɛn hã, uwuruwi aka agha ri itɛrhĩ unying nggu umum.

²¹ Ungwẽ-Ner awuri ikpe ru nyaka umbɔ aka atseng ri itsinga. Bɔr atorh uner ha aka ighadak Ungwẽ-Ner! Ugba umbɔ asi imarmbɔ unga.>>

Ubingha urhεε Uteijee

(Umat 26.26-30; Irh 22.14-23; 1Uko 11.23-25)

²² Umbɔ aka adẽẽ igha ubingha, Uyesu anyangu uborodi, atar uwεε ru Unum, abvũ adzowe ra angwẽ imesanga agε, <<Àka ayɛi uwεrε atãi. Awu iyormum.>>

²³ Na anyangu ukpɛwa amẽ inebe, atar uwεε ru Unum na adzowe ru umbɔ, kishoo ahwa ru umgbɔ.

²⁴ Uyesu agɔr umbɔ agε, <<Akεrε awu adzirhmum aki ibibemuwe-Num nggu anernga, aka idze ru ubok anera arhɛrhe.

²⁵ Umum indɛyiwa umbi idzidzɛrhe, umum isi íbvui ihwamum amẽ inebe akεrε utseku unumkpi umum iki ihwa akika afa akɔɔ ri Iyɛrhe Unum.>>

26 Umbə aka amaa itsūwe ubom ru Unum, umbə adzek azĩmbə Igũ Acucii Uzaitun.

Ubitru awuri itsɛyi Uyesu

(Umat 26.31-35; Irh 22.31-34; Uyoh 13.36-38)

27 Uyesu agər angwě imesanga agɛ, <<Kishookambi awuri itĩ na abəra umum ikiyikami, ru nyaki itseng Arherhu-Num iki igər igɛ,

<<Umum ikwɛr uner uwuku udzɛu idəi, idəsa ikɛi iwuri isitungge.>*

28 Bər ivangyɛ umum iki isok ra akpe, umum inggbaashia izĩ Ugarhirhi ru umbi adərha atsĩ umə.>>

29 Ubitru agər unga agɛ, <<Kishoo aba atĩna na abərambə ungo, umum isi ínekamum ungo.>>

30 Uyesu agər unga agɛ, <<Umum indɛyiwa ungo idzidzerhe, irherɛ, ru untsua ukpirɛ, ungo uwuri itsɛyingo ihweng umum idiki itaar ni ikə idərhi igbər ukpee idiki ivaa.>>

31 Bər Ubitru abvui arherhe akarhārḥā agɛ, <<Umbə aba awuri ifere umum nggu ungo, umum isi ítɛyimum ihweng ungo.>> Kishoo angwě imesanga arherhe rimi ḥā.

Uyesu ru Ugetsemani

(Umat 26.36-46; Irh 22.39-46)

32 Azĩmbə anangkɛ umbə iki iyisa Ugetsemani, Uyesu agər angwě imesanga agɛ, <<Aka aseɪ nggimi umum izĩ ifɛn-Num.>>

33 Unga akũ Ubitru, nggu Uyaku nu Uyohana. Awu umə nukpi unga atirhunga igũ ighong akarhārḥā.

* 14:27 Aka anyā ikɛi: Uzak 13.7.

³⁴ Unga agər umbə agɛ, <<Igũ ighongyɛ iki iwe ra amɛnnum idɛɛ ifɛrngge umum. Àka aseɪ nggimi na adzɛu.>>

³⁵ Unga aka azĩ ra asu ukunjiir, na agba nu abĩ, afɛn-Num ugɛ ngge iba imɛngge, umbə anyanguwe ivang ayetnum akɛɛ ru unga.

³⁶ Unga agɛ, <<Abba,[†] Utɛ, ubɛn ubina imɛngge ru ungo. Unyanguwa ukpɛwa ayetnum akɛɛ ru umum. Bər asi iwea ubinkpi umum iki ibee, bər awu ubinkpi ungo uku ubee.>>

³⁷ Mɔcɛ unga abvui aba anyã angwɛ imesa ha ikitatambə awu ru urhə. Unga agər Ubitru agɛ, <<Ungo uwu ru urhə? Ungo usi idɛɛ idzɛupə ukara unying?

³⁸ Àka adzɛu na afɛn-Num utsur umbi agbambi ru undeya. Idzidzɛrhe ipfu ibemungge bər iyor isi ikerngge.>>

³⁹ Abvui azĩa ifɛn-Num, arherhe irhɛm iyi inggbaashia.

⁴⁰ Mɔcɛ unga abvui aba ikɛi, akpo umbə awu ru urhə asumbə awu nggu urhə akarhārḥā. Umbə ashimbə nu ubinkpi umbə aka isəme unga.

⁴¹ Ivangyɛ unga aka abvui aba ide untaar, unga agər umbə agɛ, <<Umbi ana awu ru urhə nu iwiwosha? Iki imɛ mənə! Ivanga iki ibangge. Unyã, umbə aka agha-dak Ungwɛ-Ner na atsuke unga ra abok abi arhim.

⁴² Àka asisok umɛn izĩmɛn! Uwuku ugha adakmum uwi aka abanga!>>

Adzur Uyesu

(Umat 26.47-56; Irh 22.47-53; Uyoh 18.3-12)

[†] **14:36** Abba ri idũ Uaramayak igburh <<Utɛ>>.

⁴³ Uyesu awu ra arherhe nukpi, umbɔ anyã Uyahuda, unying ra angwẽ imesanga usɔkdũmɛn hã. Unga aba nggu anera arherhe aka akpɔm igbong nu akon akika ader. Ateiya abika adzowe idɛm-Num, abika amesuwe Ikpem nu akakũmbɔ aka adene umbɔ.

⁴⁴ Uyahuda, uwuku ugha adak Uyesu, aka asɔmuka umbɔ agɛ, <<Uwuruwi umum iki ishor atamnga, awu unga nuwɔ. Aka adzur akũ azĩ. Aka angwẽdzɛn na adzɛu unga.>>

⁴⁵ Uyahuda aka aba, unga adarha azĩã ru Uyesu, agɔr unga agɛ, <<A umarhem!>> na ashor atamnga.

⁴⁶ Anera adzur Uyesu akpɔm unga uku ung-bongbong.

⁴⁷ Bɔr unying ra awɛ imesu Uyesu uwuku ukhapa ru unga, awɔɔr ikon iki idernga, azharhuwe uto ugãrhũ Ukugɔng Uwuku Udzowe Idɛm-Num.

⁴⁸ Uyesu agɔr umbɔ agɛ, <<Umbi adzeka nggu igbong nu akon aka ader adzur umum ugɛ umum iwu uvɛu?

⁴⁹ Ubɛn unuma umum iwu nggu umbi ri Iya-Num imesuwu umbi, umbi asi idzurmbi umum. Bɔr awu ufang itsɛng Arherhu-Num itsuifer.>>

⁵⁰ Mɔɛ kishoo angwẽ imesa ha atĩ abɔre unga.

⁵¹ Uwɛdzɛm nuwɔ, atamu untama ukpekũ na adɔsu Uyesu. Ri ivangyɛ umbɔ aka adzur unga,

⁵² unga aneke untamanga ra abokmbɔ na atĩ igbĩrhĩ.

Uyesu nggu abi udzɛpurhe
(Umat 26.57-68; Irh 22.54-55,63-71; Uyoh 18.13-14,19-24)

53 Akū Uyesu azī ru Ukugōng Uwuku Udzowe Idēm-Num, nu ateiya abika adzowe idēm-Num, nu ikēi abika amesuwe Ikpem nu akakū akōng.

54 Ubitru adōsa unga, bōr ukukaa-ukukaa. Atsī ru ufōm iya Ukugōng Uwuku Udzowe Idēm-Num. Umō unga aka aseī iwer urha nggu adogerhi ha.

55 Ateiya abika adzowe idēm-Num nu kishoo abi udzēpurhe abee ubinkpi uku iwe ideka ri itsi Uyesu, umbō afere unga, bōr umbō asi ikpombō.

56 Anera arherhe aka adzowe ideka igberangwī, bōr angwīmbō asi iweke unying.

57 Mōcε abōō asok adēē, adzowe ideka igberangwī ru unga agε,

58 <<Umēn igū unga agōr agε, <Umun iwuri isipuwe Iya-Num ikεrε anera aka adzin, ni idzin ikōō ri inuma itaar, ikirike iki isi iwengge idzin unera.>>>

59 Kishoo rimi hā idekambō isi iwengge unying.

60 Mōcε Ukugōng Uwuku Udzowe Idēm-Num asok adēē ra ateumbō, arhusu Uyesu agε, <<Ungo usi idzipungo arherhe? Awu use uwe ri idekayε umbō aka adzowe ri itsingo?>>

61 Bōr Uyesu anukutata asi idzipuka, Ukugōng Uwuku Udzowe Idēm-Num hā abvui arhusa unga agε, <<Awu ungo uwu Ukiristo Ungwē Uwu Idorh?>>

62 Uyesu agōr unga agε, <<Awu umum. Ikēi umbi awuri inyāmbi Ungwē-Ner aka iseī nu ubok ugha Uwu Ijee, ikēi awuri iba nu amεε afafā ra afā.>>

63 Ukugōng Uwuku Udzowe Idēm-Num hā avapuwe atorhanga, na agε, <<Umēn ibee ideka iyikisong ikēi?

⁶⁴ Um̃bi agũmbi unga aka arhenu Unum! Awu use uwu itsũwãmbi?>>

Anera kishoo arherhe agɛ, <<Agbaa! Afere unga!>>

⁶⁵ Mɔcɛ abɔɔ atirha ashau aci atsuyiwe unga, abope asunga, ikei akwɛre unga ugwɛɛ, anu igɔr unga agɛ, <<Udɛyiwa umɛn, ungaa akwɛr ungo!>> Mɔcɛ adogerhi abi udzɛpurhe ha akũ unga azĩmbɔ na akwɛr unga.

*Ubitru agɛ Uyesu asi iwea uwu unga
(Umat 26.69-75; Irh 22.56-62; Uyoh 18.15-18,25-27)*

⁶⁶ Ubitru iganga awu unɔr ufɔm iya ha, unaa uwɔɔ ra anang itser Ukugɔng Uwuku Udzowe Idɛm-Num aba.

⁶⁷ Unga aka anyã Ubitru aka ase iwer urha, unga angwɛdzɛn na arhi unga, na agɛ, <<Ungo uwu nggu Uyesu uner Unazarat ha!>>

⁶⁸ Bɔr Ubitru atɛyinga agɛ, <<Umun isi ihwɛng ubinkpi ungo uku urherhe.>> Unga aka arherhe rimi amaa, unga asok atsĩ ru udzɛpurhe iya ha. Kanying ikɔ igbɛr ukpee.

⁶⁹ Unna hã aka abvui anyã unga umɔ, unga adɛyiwe abirabɛ aka adẽẽ umɔ agɛ, <<Uwɛrɛ awu nggu umbɔ.>>

⁷⁰ Ikei Ubitru abvui atɛyinga.

Ivanga ukunjiir iki itɔng, abirabɛ aka adẽẽ akhapa ru Ubitru agɔr unga agɛ, <<Asi iwea ubin itsɛyi, ungo uwu nggu umbɔ, ungo usi iwea uner Ugarhirhi?>>

⁷¹ Mɔcɛ Ubitru atirhunga ifuw atsukuka ikponum nu itsinga, ayirh uyirh ra asumbɔ

agɛ, <<Umun isi ihwɛng utsakwi umbi aka anu irherhe ri itsinga.>>

⁷² Kanying ikɔ ibvui igbɛr ukpee ide uvaa. Mɔcɛ Ubitru ayita arherhe Uyesu aka adɛyiwe unga agɛ, <<Ungo itɛyingo ihwɛng umun idiki itaar ri ikɔ idɔrhi igbɛr ukpee idiki ivaa.>> Ngge unga atsĩã iciu akpe.

15

Akū Uyesu azĩ ru ugomna Ubirhatu

(Umat 27.1-2,11-14; Irh 23.1-5; Uyoh 18.28-38)

¹ Ri igɔkpeeka ateiya abika adzowe idɛm-Num nu akakū, nu abika amesuwe Ikpem, nu kishoo abi itser udzɛpurhe akɛki itsūwã. Umbɔ abow Uyesu akūna unga azĩmbɔ ra asu Ubirhatu.

² Ubirhatu arhusa unga agɛ, <<Awu ungo uwu uyɛrhe abi Uyahuda?>>

Uyesu agɔr unga agɛ, <<Ungo uku urherhungo.>>

³ Ateiya abika adzowe idɛm-Num hã, agbɛyi urherhe atsuke unga ra abina arherhe.

⁴ Ngge ikɛi Ubirhatu arhusa unga agɛ, <<Unyã arherha abinmbɔ aka agbɛyi atsuka ungo. Ungo usi idzipungo arherhe?>>

⁵ Bɔr Uyesu asi idzipunga arherhe. Ubirhatu adzeidzeu.

Atsu ufai akpe ru Uyesu

(Umat 27.15-26; Irh 23.13-25; Uyoh 18.39–19.16)

⁶ Icɛ awu ugau ugomna aka isaka atsūwe unerwi umbɔ aka abow ru ugborzĩ, uwuruwi anera aki ibee ru unum Irhowa Iyiki Igar Utɔng.

⁷ Uwɔɔ ruwɔ itsoka igburh Ubaraba, uvau isoyamen nu ifer uner itsu umbɔ agbange unga ru ugborzĩ hã nggu abɔɔ.

⁸ Ikikɔnga iba ifen Ubirhatu unga akorhuwe ubin unga aka abayi ikikorhe.

⁹ Unga agɔr umbɔ agɛ, <<Umbi abee umum itsũwã Uyerha abi Uyahuda ru umbi?>>

¹⁰ Unga ahwɛnga agɛ awu unyẽẽ utsu ateiya abika adzowe idɛm-Num atsuke Uyesu ru uboknga.

¹¹ Bɔr ateiya abika adzowe idɛm-Num atsu an- era agɔr agɛ aneke Uyesu ru ugborzĩ, na atsũwe Ubaraba ru umbɔ.

¹² Ubirhatu arhusa umbɔ agɛ, <<Umun iwuri ikorhe uguse nggu uwuruwi umbi iki iyisa Uyerhe abi Uyahuda?>>

¹³ Umbɔ atsarhi irhakmbɔ agɛ, <<Anyapuwe unga!>>

¹⁴ Ubirhatu arhusa umbɔ agɛ, <<Awu use utsu? Ashɔyi use arherhunga?>> Umbɔ agbisha atsarhi irhakmbɔ agɛ, <<Anyapuwe unga!>>

¹⁵ Ubirhatu aka abee itsu umbɔ agɔm unga, atsũwũka Ubaraba. Unga aka atsu umbɔ akwɛre ugwɛɛ ru Uyesu amaa, unga adzowuka unga umbɔ anyapuwe.

*Abi iwa ayɛɛi Uyesu
(Umat 27.27-31; Uyoh 19.2-3)*

¹⁶ Abi iwa akũ Uyesu azĩ ru udzepurhe ugomna, umbɔ iki iyisa agɛ, <<Upiretoriyum.>> Na akɔng kishoo ukpui abi iwa ha.

¹⁷ Atsime atorho aka abārḥā akagōng aki iyērhe nū Uyesu, ikei akare ifur iyērhe iyī ídidək, atsime ni itsinga.

¹⁸ Umbō atirhi ighwe unga agē, <<Urhengo uder, Uyērha abi Uyahuda!>>

¹⁹ Ikei anu ikū igbong akwēr unga ni itsia, atang aci atsuyiwe ru unga. Na atangarhu agē umbō anu idzowe unga igōng.

²⁰ Umbō aka ayēēia unga rimi amaa, umbō atsimuwe atorho aka abārḥā akagōng hā, na atsime atorhanga. Mōcē umbō akūna unga adzek azĩmbō inyinyapuwe.

Anyapuwe Uyesu

(Umat 27.32-44; Irh 23.26-43; Uyoh 19.17-27)

²¹ Utsa uwōō adzeku Usayirin, itsoknga igburh Usiman utēmbō Uarhekezanda nu Urhufō, adzek ri ibang abī hā na atōng ru uteu ha. Umbō atsu unga inggang unga atsā igārḥāmau ucucii Uyesu.

²² Akū Uyesu azī ra anangkē umbō iki iyisa Ugorhgota, agbena agburh, <<Anang Apfupfu Aghow Itsi.>>

²³ Mōcē umbō adzowe unga amē inebi aka asarhe nggu isung, bōr unga akpēē ihwihwaa.

²⁴ Mōcē umbō anyapuwe unga. Umbō agasha atorhanga ra adəkambō, atang iseng ra atsimbō anyā ubinkpi uben unera aka ikpo.

²⁵ Awu ra akara utōrha aki ukpee umbō aka inyapuwe unga.

²⁶ Umbō atseng isarhe iyiki irhena unga agē, <<UYERHA ABI UYAHUDA.>>

²⁷ Anyapuwe avɛu avaa nggu unga, unying nu ubok ughanga, uwu uvaa ikei nu ubok uferanga.*

²⁹ Anera aka atɔng, arhena unga, azung atsimbɔ agɛ, <<Ìhĩ! Ungo iki isipuwe Iya-Num, nu udzine ike ikei ri inuma itaar,

³⁰ ucipuwa ru igārhāmau ucuciia ha ufɔrh itsingo!>>

³¹ Rimi hā ikei ateiya abika adzowe idɛm-Num nu abika amesuwe Ikpem ani iyɛɛia unga ra adɔkambɔ agɛ, <<Afɔrhuka abɔɔ, bɔr asi idɛɛ afɔrha itsinga!

³² Uneke Ukiristo uwurɛ, uyerhe abi Uisrairha, acipuwa icɛɛ ru igārhāmau ucuciia uwurɛ, ru umɛn inyā ni iwe ru imangmang!>> Avɛu ha umbɔ aka anyapuwe nggu unga arherhu nggaa urhena atsuke unga.

Akpe Uyesu

(Umat 27.45-56; Irh 23.44-49; Uyoh 19.28-30)

³³ Ri idzingga atenuma, uzĩ itsirkpɔ abĩã kishoo, utseku akara ataar aki urhɛɛ.

³⁴ Ra akara ataar, Uyesu atsarhi irhaknga ikerketangge agɛ, <<Erhoi, Erhoi, urhama sabaktani?>> Agbena agburh, <<A Unummum, a Unummum, awu use utsu ungo uneka umum?>>†

³⁵ Abika adɛɛ ukhapa umɔ aka agũ rimi, umbɔ agɛ, <<Àka agũ, unga adɛɛ iyisu uner uwuku usɔm Arherhu-Num Uirhiya.>>

³⁶ Unying ru umbɔ atĩ, azĩ abii usoso ra amɛ inebe akika agbata, avaki igbong, abera adzowe ru

* **15:27** Abvur akɔɔ aki itsɛng abok aki isha agɔrke ikei ugɛ, **28** Akɛɛ ake atsuafer itsɛng hā iki igɔr igɛ, <<Avarha unga ra abi avau.>>

† **15:34** Àka anyā ikei: Amb 22.1.

Uyesu ahwa. Unga age, <<Àka adidëë! Umən inyāni use Uirhiya awuri iba acipuka unga.>>

³⁷ Uyesu atsarhi irhaknga ikerketangge, atsu ivum na akpea.

³⁸ Urhaburhe ha ukpuku uwe ru Iya-Num uvaar agbëra avaa udzur afafã uba utsĩ ra abĩ.

³⁹ Ivang unggbaashi abi iwa uwuku udëë ra asu Uyesu aka anyã ikpũ akpea, umə unga agər age, <<Icicang ishingge, utsak uwurë awu Ungwë Unum!>>

⁴⁰ Akatsərɛh abɔɔ adëë ukukaa na azərhe. Ru umbɔ ha awu umbɔ Umaryamu Umagadarha, nu Umaryamu uyisa Uyaku ungwëmbɔ Uyesu uku ucia nu Uyusuf, nu Usarhomĩ.

⁴¹ Umbɔ atirhi idɔsa unga ru Ugarhirhi anu itɔ itser iyike unga. Akatsərɛh abɔɔ ikëi arhərɛh abika aba nggu unga azĩ Urusharhima awu umə.

Igwirhuwe Uyesu

(Umat 27.57-61; Irh 23.50-56; Uyoh 19.38-42)

⁴² Urhëë uku uwe, umbɔ adëëmbɔ igbisha abin udãã awu unum ukpuku uwosha.

⁴³ Utsa uwɔɔ agburh Uyusuf uner Uarimatiya, unga awu ra abi itser ru udzëpurhe, awea ri itsu amən ibiba Iyərhe Unum. Aker amən azĩ ru Ubirhatu ashōrhã unga adzowe iyor Uyesu.

⁴⁴ Ubirhatu adzeidzeu unga aka agũ ugë Uyesu aka akpea. Unga ayisu unggbaashi abi iwa ha arhusa use awu idzidzërhe Uyesu aka akpe.

⁴⁵ Unga aka agũ ra angwĩ unggbaashi abi iwa ha, məcə unga adzowuka ukom iyora ru Uyusuf.

⁴⁶ Nggee Uyusuf azĩ agoi atorho, acipu iyor Uyesu, akũ atorha ha abow iyor ha, atsuke ngge

ru udzakkpi umbɔ aka atseẽ ru utarh. Unga agõrhũ utarh ukpɔɔ afɔme angwĩ udzak ha.

⁴⁷ Umaryamu uwuku udzeku Umagadarha nu Umaryamu uyisa Uyusuf adẽẽ azerhe anangkɛ umbɔ aka angwẽwe iyor Uyesu.

16

Isisok Uyesu ra akpe

(Umat 28.1-8; Irh 24.1-12; Uyoh 20.1-10)

¹ Unum ukpuku Uwosha uku utɔng, Umaryamu Umagadarha nu Umaryamu uyisa Uyaku, nu ikei Usarhomi, agoi abin isung akirakɛ umbɔ aka izĩ adzukuwe ri iyor Uyesu.

² Ru unum ukpu inggbaashia ri inuma utɔɔva, ru ukpeeka ri ivangyɛ ishaa unum iki idzek, umbɔ atirhumbɔ izĩ ru udzaka.

³ Umbɔ aka awu ru utsĩndĩ, umbɔ agɔr adɔkambɔ agɛ, <<Ungamɔ awuri igõrhuwe utarha ra angwĩ udzaka?>>

⁴ Bɔr umbɔ aka azĩ atsĩ umɔ, umbɔ abera asumbɔ anyã nggaa utarh ha uku ugõrhũkpɔ.

⁵ Umbɔ aka atsĩ ru udzaka, umbɔ anyã uwɛdzɛm aka atsim atorho aka aterha aseɪ udiku ubok ugha, umbɔ agũ iwei.

⁶ Ungwɛdzɛm hã agɔr umbɔ agɛ, <<Àka niba agũmbi iwei. Umbi abee Uyesu uner Unazarat uwuruwi umbɔ aka anyapuwe. Aka asoka! Ashia nggimi. Àka anyã anangkɛ umbɔ aka angwẽwe unga.

⁷ Àka azĩ adɛyiwe angwẽ imesanga nu Ubitru, unga agbaashia azĩ Ugarhirhi ru umbi. Nggɔɔ ha umbi aka inyã unga, ru nyaka unga aka asɔma umbi.>>

⁸ Akatsɛrh ha atĩ adzek ru adzak ha, adzunumbɔ na azang ayormbɔ, asi irherhumbɔ arherhe nggu unera, ubinkutsu umbɔ agũ iwei.

[Abvur itsɛng abok akɔɔ aki isha ashike ru ubvur Umar 16.9-20]

*Uyesu adzeka ru Umaryamu
(Umat 28.9-10; Uyoh 20.11-18)*

⁹ Ivangye Uyesu aka asoka akpe ru unkpeka ru unum ukpu inggbaashia ri inuma utɔɔva, agbaashia adzeka ru Umaryamu Umagadarha, utserh ha Uyesu aka atsũwe ípfu iyiki ibewe utɔɔva.

¹⁰ Unga azĩ asɔme abirabɛ aka awu nggu Uyesu, umbɔ agũ ighong na aciu akpe.

¹¹ Umbɔ aka agũ uge Uyesu aka asoka nggu urhɛ, ikɛi unga nibikanga anyã Uyesu, umbɔ asi ibemumbɔ.

*Uyesu adzeka ra angwɛ imesa avaa
(Irh 24.13-35)*

¹² Akɛɛ aka amaa Uyesu adzipa adzeka ru nyaku uner uwɔɔ ra angwɛ imesa abɔɔ avaa ri ivangye umbɔ aka azɛrhã adzek ru uteu ha adɔsu utsĩndĩã azĩmbɔ.

¹³ Ikivarhambɔ abvui aba asɔme abimbɔ, bɔr utseku icɛɛ umbɔ ashimbɔ ri imangmang ri isarhe ha.

*Uyesu adzowe angwɛ imesanga itser
(Umat 28.16-20; Irh 24.36-49; Uyoh 20.19-23;
Aiy 1.6-8)*

¹⁴ Ri imaatak Uyesu aka adzeka ru umbɔ usɔka nu unying hã ri ivangye umbɔ aka ase i gha ubingha. Unga atserha umbɔ ri ida imangmangmbɔ,

nu iker itsimbɔ, umbɔ aka asi ibemumbɔ arherhe abirabɛ aka agbaashia anyã unga ri isisoknga.

¹⁵ Ikei unga agɔr umbɔ agɛ, <<Åka atsĩ ru upfunga kishoo adzowe Isarhe Iyiki Ize ra anera kishoo.

¹⁶ Uben unera aka awea ri imangmang, umbɔ asorhukumbɔ unga ubɔtisima, awuri ikpikpoa ififɔrh, bɔr uben unera aka akpẽẽ iwe ru imangmang awuri itsitsĩm.

¹⁷ Atsar ake aka idɔsa abika awuri imangmang, ri itsokmum, umbɔ awuri itsũwũkumbɔ ípfu iyiki ibewe, awuri irherhumbɔ idũ iyiki ifa.

¹⁸ Awuri inyãgumbɔ íbvui ra abokmbɔ, ikei umbɔ aba ahwambɔ umau, ake asi íkorhuke ubin ru umbɔ. Umbɔ aba atsorha abokmbɔ ra abi irhãrhã, umbɔ awuri ikerhumbɔ.>>

Uyesu afũã ra afã

(Irh 24.50-53; Aiy 1.9-11)

¹⁹ Uteijee Uyesu aka amaa irherhuwe umbɔ arherhe ha, ashupa unga akũ afũmbɔ ra afã, unga aseisa nu ubok ugha Unum.

²⁰ Mɔcɛ angwẽ imesanga adzek adzise isarhe uben ananga, Uteijee atɔ itser nggu umbɔ, akorha abin idzeu atsu arherhambɔ awu idzidzerhe.

Ibibemuwe-Num Iyiki Ifa Ru Dũya
Duya: Ibibemuwe-Num Iyiki Ifa Ru Dũya (New
Testament)

copyright © 2024 Wycliffe Bible Translators, Inc.

Language: (Duya)

Translation by: Dũya Development Association

Contributor: SIL Nigeria

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-08

PDF generated using Haiola and XeLaTeX on 8 May 2025 from source files dated 8 May 2025

3ccd0531-8578-54e4-a023-62d4592e4b27